

Digitized by the Internet Archive
in 2019 with funding from
Getty Research Institute



cra defactò uni & soli adstringit, irremissa industria institutum, atque in fiduciam ingredi, postremo hoc TOMO, qui plurimùm laboris conquiendo, pingendo, componendo, describendo à sola manu mea poposcerat, gratiâ DEI intra triennium perfectò, ambos anteriores eodem saltem temporis spatio à me posse absolvi. Sat citò egerim hoc pacto, modò pariter fiat benè.

F I N I S.



QUINQUAGENA
SYMBOLORUM
HEROICA,

IN

PRÆCIPUA CAPITA ET DOGMATA

S. REGULÆ

SANCTISSIMI

MONACHORUM PATRIS
ET LEGISLATORIS

BENEDICTI,

OMNIUM JUSTORUM

SPIRITU PLENI:

AD RECOLLIGENDUM ANIMUM HORIS
SUCCISIVIS CONCEPTA,

ET

EXEGESIBUS BREVIBUS

METRICO - PROSAICIS

ASCETICIS

ILLUSTRATA:

AUTHORE

P. CHRYSOSTOMO HANTHALER,
S. ET EXEMT. ORD. CISTERC. ANTIQUISS. ET DUCALIS
MONASTERIJ VALLIS B. M. V. DE CAMPOLILIORUM AUSTR. INFER.
PROFESSO, AC BIBLIOTHECARIO, NEC NON INCLYTÆ PROVINCIÆ
CISTERCIENS. AUSTRIACÆ SECRETARIO.

CUM FACULTATE SUPERIORUM.

AUGUSTÆ ET LINCIJ,

Impensis Francisci Antonij Ilger, Bibliopolæ.

CREMBSIJ, Typis Ignatij Antonij Präxl, Universit. Viennens. Typogr. Anno 1741.

depicta debite compleat: deinde ut intentum ab Authore ulteriorem Conceptum dexterè assequatur, ad eumque Figuræ ac Lemmatis significationem propriam, ac naturalem accommodet ritè, & applicet. Tandem sanè nec illi, qui Symbolum Conceptui applicatum commodè explicare, explicatum præterea bellè & eruditè illustrare voluerit, ingenium debet aliquando deesse.

Nequaquam interim is, qui quidlibet pingit, ac superscribit, bonum Symbolum conficit, iudicio docto probandum; tam rebus, quàm Verbis dudum à præclaris Symbolorum Magistris Regulæ justæ, eæque non paucissimæ, cum ratione præscriptæ sunt. Quas antequam afferam, præmonere oportet, Symbole distinguere à Viris Doctis, & alia *Heroica*, alia *Moralia* dici. Prima, quæ sola propè laudem ferunt & approbationem Eruditorum, nomen suum fortita sunt ab Heroibus Veteribus, & Bellatoribus fortissimis: qui, sive domi virtutem suam Equestribus Ludis exercerent, sive deinde ipsa in acie adversus hostem severè decertarent, hujusmodi picturis atque lemmatibus proprii Imaginem Animi in Galeis Scutisque suis coram intuitibus omnibus, qui tamen ingenio valerent, propalam præstulerunt. Quare Symbole *Heroica* nonnisi grandibus Personis, & Factis congruè adhibentur: & quemadmodum ex Imagine, ac Lemmate componuntur, ita Symbolographi, per analogiam ad hominem, naturales rerum imagines, in Symbolo per penicillum scalprumve expressas, appellant *Corpus*, Lemmata verò *Animam* dicunt, utrisque plurimæ legi adstrictis. Symbole *Moralia*, uti passim & promiscuè ad quidlibet ornandum, atque similitudinariè innuendum adhiberi solent, ita & sine lege ac ordine ex cujuslibet ferè libitu finguntur, ac proinde, velut operæ tumultuariæ, præcipitisque ingenij proles immaturæ, à censu perfectorum Symbolorum per Senatum Eruditum excluduntur. Cum tamen & ipsa Imaginem habeant ac Lemma, differunt ab *Hieroglyphicis*, quæ sola imagine constant, item ab *Ænigmatibus*, quæ solis verbis componuntur. *Emblematibus* nomen quandoque & *Symbolis* tribuitur: revera tamen est Pictura amplior, integras historias, latasque explicationes admittens.

Pro Corpore porro *Symboli Heroici* sequentes potissimum Leges indicatæ sunt, à me vel triverbio hinc appositæ. I. Figuram depictam oportet esse decoram, non turpem. II. Facilem præterea cognitu, neque peregrinam, sive non nisi paucissimis notam. III. Planam insuper, non perplexam, & quæ ab alia simili internosci ægrè admodum possit. IV. Non tamen propterea vulgarem nimis, quin potius selectiorem, ac nobilem. V. Sin gemina corpora, vel plura, ut creberrimè accidit, exprimenda fuerint, nullatenus tamen talia sint, quæ natura repugnante conjungi non decet, sive quæ saltem non solent uniri. VI. Unumquodque tandem Corpus, sive simplex, sive alteri conjunctum, situ, cumque sustentaculo sibi congruo exhibeatur, nec aliquando hæreat in aere suspensum.

Pro Lemmate hi ferè sunt Canones. I. Determinet conceptum, indicandò certam corporis picti proprietatem naturalem: nequaquam tamen se solo, sensuque absoluto, sed semper una cum corpore loquatur,

quatur, subjectum suum è pictura supponens, & reticens. II. Nunquam proinde sit perfecta sententia. III. Sit verum, ac de re vera. IV. Non commune, eodemque sensu applicabile pluribus diversi generis rebus. V. Breve sit, & acutum, neque tamen obscurum, amphibologicum, æquivocum, sive hyperbolicum. VI. Argutiam amat, eleganterque desumitur ab Authoritate, sive constet verbis S. Scripturæ, Patrum, Doctorum, Oratorum, Poëtarum: modò tertium verbum rarò excedat. VII. Nunquam verò explicet Conceptum moralem ab Authore intentum: cuius assecutio & Applicatio est solius videntis.

Ecce! Leges *Heroici Symboli* obiter commemoratas: quas paradigmatis unici locò, servatas demonstro in *Symbolo* prævio hujus Præfationis. Speculum ibi vides, è columna suspensum, cum se solo librari in Aëre nequiret. Lemma sic exaratur: **DELECTAT, ET PRODEST.** Imperfectus hic sensus subjectum suum, i. e. vocem *Speculum*, supponit ex ipsa pictura, imaginem Speculi referente. Prædicata ambo *Delectat, & prodest*, non nisi naturales proprietates speculi designant, quæ sunt, quòd intuenti redhibitione formæ suæ jucunditatem afferat, simulque verò utilitatem: quia, si quid in vultu ejus maculosum sit & immundum, fideliter commonstrat, ut abstergi, vel elui possit. Conceptum porro ulterius intentum insinuat quidem, ac determinat, neque tamen explicat, vel applicat, videnti illum reliquens. Qui dum conspicit, hoc Symbolum præire Dissertationi de Symbolorum natura, non difficulter intelligere poterit, hic denotari, habere se Symbola ad Speculi modum, delectare ingenio, quo concepta sunt, & arte penicilli, prodesse autem sensu, atque doctrina latente, quam præbitura sunt, si acuta reflexione evolvantur. Sin verò ulterius meditando progredi libeat, insuper occurret, Symbola universa hujus opusculi, tanquam Speculum quoddam lucidum universæ Perfectionis regularis, suspensum, sive fundamentum, atque innixum SS.^{mo}. Legislatori BENEDICTO, ejusque ingenti Spiritui, tanquam Columnæ solidissimæ, varietatè suâ intuentibus delicias parere, Exegesibus verò additis perutilia regularis & sanctæ observantiæ documenta suggerere, vel denua in memoriam revocare. Semper etenim, quisquis Conceptum intentum dexterè assequi cupit, prænosse debet, & ritè attendere, qua occasione, quam ad Personam honorandam, quale ad Factum illustrandum, vel cui Dogmati, Doctrinæque suggerendæ Symbola hæc vel illa adinventæ sint. Et hætenus quidem de Symbolis.

Quoniam interim, uti sola fortitudo, vel potius robur corporis, ad laudem meritumque Virtutis nunquam assurgit, ita & Animi heroici quantumvis imperterrita & invicta magnitudo, quamdiu tamen intra solius Honestatis naturalis limites continetur, ad apicem Fortitudinis, motivis supernaturalibus innixæ, nullo modo pertingit: *Heroici* certè *Symboli* excellentia aptissimè illorum Animorum magnitudini, velut in imagine pingendæ, adhibetur, qui ex virtutis solidæ, Legisque Divinæ præscripto, seipsos propter DEI solius obsequium, lucta per omnem vitam difficillimâ, heroicè vident, & superant. Atque horum in numero nulli rectius censendi sunt, quam Viri verè Religiosi, Sacræque Benedictinæ Regulæ, in quam jurârunt, exacti




exacti atque fideles Cultores : qui pro omni se vita sua sibi ipsis abnegantes , DEO se veluti perpetuas , gratissimásque Obedientiæ victimas , omni die piissimè sacrant , & immolant.

Inde est, quòd animus mihi venerit , cùm spiritum recolligere , Sacræque in me Regulæ amorem & observantiam igne novo inflammare contenderem , *Quinquaginta* hæc *Symbola Heroica* super præcipua illius Capita ac Dogmata , pro Gratia mihi desuper data , concipiendi , pingendi , & brevibus Exegetibus metrico-prosaicis Asceticis mihi præprij hi præsent , judicio visa sint aliis pariter posse prodesse , & utile dulci non incommodè miscere , piæque , quam Symbola excitant , curiositatis melle subjunctarum Considerationum Asceticarum jacula quodammodo delinire , ut blandius feriant : cum Gratiola eorum Facultate in publicum emissâ , sunt.

Meum porro votum est , ut hæc Symbola Viros multos Religiosos , sub SS. Legislatoris BENEDICTI , *omnium Justorum Spiritu pleni* , Regula , *Discretionè præcipua* , militantes offendant , quorum vera & viva Imago ex merito esse censerì possint : aliis verò , uti mihi , ad reformandam in se veri Spiritus Benedictini Imaginem , qualemcunque operam commodam , auspice DEO , Boni omnis solo Authore , valeant præstare. Quem in finem de genibus humillimè supplico eidem Omnipotenti DEO cum universa Ecclesia regulari Benedictino-Cisterciensi , ut excitet in nobis Spiritum , cui beatus BENEDICTUS Abbas servivit , detque nobis , eodem Spiritu repletis , amare , quod ille amavit , & opere exercere , quod docuit , Amen. Scribebam Campililij ipso festo SS. Patris die 21. Martij Anno MDCCXLI.





FACULTAS

REVERENDISSIMI

DOMINI

VICARII GENERALIS.



NOS CHRYSOSTOMUS Sacri & Exem-
ti Ordinis Cisterciensis Ducalis Monasterij Val-
lis B. M. V. de Campoliliorum Abbas, ejusdém-
que Ordinis per Utrámque Austriam, Stiriam,
& Regnum Hungariæ Vicarius & Visitator Ge-
neralis, tenore præsentium concedimus, ut *Quinquagena Sym-
bolica in præcipua Capita & Dogmata S. Regulæ SS. Monacho-
rum Patris & Legislatoris BENEDICTI, cum brevibus Exe-
gesibus Asceticis*, à Rev. ac Relig. Patre Chrysostomo Hant-
ler, Monasterij nostri Professo, & Bibliothecario, nec non
Vicariatus nostri Secretario composita, quæ ex sententia Theo-
logorum nostrorum ad Disciplinam Regularem stabiliendam,
atque ampliùs provehendam plurimùm conducere videtur,
(si & iis, quorum interest, ita visum fuerit) in lucem pro-
deat, publico profutura. In quorum fidem eidem has Lite-
ras, manu nostra subscriptas, & Sigillo munitas dedimus.
Campililij die 16. Junij Anno 1741.



CHRYSOSTOMUS Abbas
ibidem, & Vicar. Generalis m. p.





T A B U L A

Materiarum hujus Opusculi Symbolici.

P RAEFATIO. De Natura Symbolorum Heroicorum.		XXVI. Reverentia Orationis.	51.
STMB. I. Auditus Cordis.	1.	XXVII. Cura fratrum delinquentium.	53.
II. Arma Obedientiae.	3.	XXVIII. Oeconomorum diligentia.	55.
III. Festina Conversio.	5.	XXIX. Fuga Proprietatis.	57.
IV. Facilis benè agendi Habitus.	7.	XXX. Murmurationis malum.	59.
V. Cœnobitarum Genus fortissimum.	9.	XXXI. Cura Infirmorum.	61.
VI. Prodesse debet, quisquis præest.	11.	XXXII. Lectio Mensalis.	63.
VII. Æqualis omnium Amor, & disciplina.	13.	XXXIII. Abstinentiæ Utilitas.	65.
VIII. Multorum serviendum est moribus.	15.	XXXIV. Silentium maximè nocturnum.	67.
IX. Animæ ante omnia curandæ.	17.	XXXV. Operi DEI nihil præponendum.	69.
X. Inobedientium orvium pœna.	19.	XXXVI. Otiositas fugienda.	71.
XI. Mortis quotidiana Meditatio.	21.	XXXVII. Reverentia Templi.	73.
XII. Obedientia velox.	23.	XXXVIII. Hospitalitatis leges.	75.
XIII. Timor Domini.	25.	XXXIX. Orandum cum Hospite.	77.
XIV. Abnegatio propriæ voluntatis.	27.	XL. Verus Finis profitendæ religionis.	79.
XV. Conditiones sanctæ Obedientiæ.	29.	XLI. Salva sub Lege regulæ Libertas.	81.
XVI. Obedientia inter dura.	31.	XLII. Sacerdotis Perfectio.	83.
XVII. Humilis Confessio peccati.	33.	XLIII. Vitæ meritum, non ætas discernenda.	85.
XVIII. Paupertas Corporis & Spiritus.	35.	XLIV. Honore omnes præveniendi.	87.
XIX. Humilitas linguæ & animi.	37.	XLV. Infirmitatum alienarum tolerantia.	89.
XX. Vita Communis.	39.	XLVI. Obedientia mutua.	91.
XXI. Taciturnitatis studium.	41.	XLVII. Communis Utilitatis studium.	93.
XXII. Continentia risûs.	43.	XLVIII. Charitas. Fraterna.	95.
XXIII. Modestia vocis.	45.	XLIX. Abbatis Dilectio.	97.
XXIV. Compositio oculorum, & totius Corporis.	47.	L. CHRISTO nihil præponendum.	99.
XXV. Concordia cordis & oris in Psalmodia.	49.		



SYMBOLUM I.

Auditus Cordis.

TEXTUS. Ausculta, ô Fili, præcepta Magistri,
& inclina **AUREM CORDIS** tui, & admonitionem
pij Patris libenter excipe, & efficaciter comple.
Init. Prolog.

I.



EXEGESES.

Missos ore sonos equidem prima excipit Auris:
Illico sed Menti prompta ministra refert.
Vellicat ergo tibi Cordis, non Corporis Aurem
Legis dando suæ tam pia jussa Pater.
Audi Corde libens, auditâque perfice factis:
Nam non sunt Auris, sunt bona Cordis opus.

Nemo sine aure corporis nascitur homo. Sed si quilibet auditor verbi esset & factor, scandala nulla Regnum DEI turbarent. Quoties Veritas per Prophetas suos, per se, per Apostolos clamavit: *Qui habet aures audiendi, audiat?* Disertè suos admonuit Vates Regius, neque minùs cum illo nos Pater sanctus obtestatur: *Hodie, si*
A *vocem*

vocem ejus audieritis, nolite obturare corda vestra. Infelicissimi illi, de quibus Dominus antea per Prophetam *Isaiam Cap. VI. v. 9.* postea per seipsum *Matth. XIII. v. 15.* querebatur: *Incrassatum est cor populi hujus, & auribus graviter audierunt, - - ne quando convertantur, & sanem eos.* Tantum interest inter *aurem cordis & corporis.* Atque propterea in rutilo cœlo unius Gremij Religiosi stella adeo differt à stella in claritate. Omnium aures ferit equidem quotidie sacræ Regulæ sonus idem: at verò non omnium corda idem affectus veritatis, per verba sonantis, inflamat. Quærit interim DEUS in multitudine populi sui operarium suum, aded cupidus cordis nostri sibi obaudientis, ut, antequam eum invocemus, dicere velit, *adsum.* Adaperiat itaque ille cor nostrum non minùs, quàm aurem, in Lege Patris nostri sancti, immo & sua, atque in præceptis suis, & faciat pacem. Juravimus in Legem: ne, obsecro, obturemus ei corda nostra. Exitiabile nobis, si coëgerimus Dominum, ut & ipse juret in ira sua, si introëamus in requiem suam.



SYMBOLUM II.

Arma Obedientiæ.

TEXTUS. Ad te ergo nunc meus Sermo dirigitur, quisquis abrenunciâns propriis voluntatibus, Domino CHRISTO Vero Regi militaturus, OBE-
DIENTIÆ fortissima atque præclara ARMA assumis.

Prolog.

2.



EXEGESES.

*A*Mbitio innumeris gerit exitiabile bellum
Ensibus, ac telis, funera mille struit.
Flamma furit, bombarda tonat, crepitantque sarissæ:
Urbes, tecta, viri, mœnia, castra ruunt.
Suave Jugum Domini sed fortius omnibus unum est:
Quippe stygem subigit, diripit atque Polum.

SI, teste Sapiente Proverb. XXI. v. 28. Vir obediens loque-
 tur Victoriâ, Obedientiâ certè Arma subministrat:
 quæ tantò fortiora esse oportet, quantò sunt illustrio-
 res Victoriæ, hac armatura paratæ. Militas per eandem non
 homini Regi, sed Regi Regum DEO, Domino Exercituum.
 Non vincis regiones & populos; sed de teipso, de natura, de
 passio-

passione, de voluntate tua triumphas. Quo de genere Victoriæ dudum jam decantatum habemus: *Fortior est, qui se, quàm qui fortissima vincit Mænia.* Spolia refers plusquam opimâ, Virtutes, ac Merita. Tropheum erigis non de exuviis, de armis, de prædis obtruncatorum hostium: sed de vitiis extirpatis, de diabolo victo, de morte contrita. Prædam occupas, non Urbes & Regna, sed Regnum Cœlorum. Macte igitur animo, Religiose Miles! videsis, quàm verè Sanctus Legislator tuus dixerit, te *Obedientiæ fortissima atque præclara arma assumere.* Parem armis animum fume, digna utrisque tecum prelia confere, incessabiles de concupiscentia, de superbia, de voluntate tua, Legi & Regi tuo DEO identidem refractaria, Victorias loquere. Aude pro cœlo: Vir esto, de adjutorio Altissimi confisus: certa pro anima tua, ne alius accipiat coronam tuam. Hoc pacto omni Mundo meliore, immo cœlo universo spectante, testante, mirante, sine sanguine Heros eris, Victor, & Triumphator immortalis.




SYMBOLUM III.

Festina Conversio.

TEXTUS. Et si fugientes gehennæ poenas, ad vitam perpetuam volumus pervenire, dum adhuc vacat, & in hoc corpore sumus, & hæc omnia per hanc **LUCIS USURAM** vacat implere, currendum, & agendum est modò quod in perpetuum nobis expediat. *Prolog.*

3.



EXEGESES.

Quid sine Luce vides? quid perficis? omnia squalent,
 Nilque oculis, manibus, nocte nigrante, potes.
 Lucem igitur poscis: sed Lux consumitur usu,
 Nique instes operi, nox inopina redit.
 Par vitæ cursus semper labentis. *Agenda*
 Sunt bona nostra citò, sunt removenda mala.

Quoniam in emendatione vitiorum, & profectu virtutum nociva est mora: quia nescit tarda molimina Spiritus Sancti Gratia. Tempus viæ tempus breve: certè in singula momenta incertum. Ni dissimulare, quod verum est,
 B tuam

tuam in perniciem callidè velis apud teipsum, plurium juvenum quàm senum tu ipse funera nosti. Idcirco Dominus dudum per Ecclesiasten *Cap. IX. v. 10.* admoneri omnes voluit: *Quodcunque facere potest manus tua, instanter operare, quia nec opus, nec ratio, nec sapientia, nec scientia erunt apud inferos, quò tu properas.* Adverte sis, obsecro: *quo tu properas,* ait, nimirum in terram, in pulverem, in mortem. Non dicit, quò & tu aliquando, suo tempore, ac tandem devenies. *Properas,* inquit. Nempe non nisi *uno gradu*, uno momento, *Mors & ego dividimur.* I. Reg. XX. v. 3. Post Sapiensem porro ipsa in carne Sapiencia apud Joannem cap. XII. v. 35. hortabatur: *Ambulate, dum lucem habetis, ut non vos tenebræ comprehendant.* Periculum itaque in hac mora emendandi summum est: tardare profectum fatuitas atque dementia maxima. Liberæ manus nunquid expeditæ? compedibûs victæ quid valent? Florente ætate, valente corpore, integris viribus nugaris in Mundo. Senio frigidus, corpore fractus, sensibus hebes, doloribus obsessus, morboque fatali jam tibi ereptus, brachia demum pro cœlo, quod sanè vim patitur, rapiendo expudies? Vel capite solo acutiùs dolens jam langues ad omnia: & ubi fatali in lectulo propingux mortis angustia toto agmine in te undique irruent, ad opera pietatis, ad omnia totius vitæ lucra neglecta uno cumulo compensanda vegetum te præsumes? Non insuper apud Divum Augustinum legisti: *Pœnitentia sera rarò vera?* Deferere peccata, non deferi ab illis, delicti gratiam obtinet. Vitæ itaque tuæ luce *ardenti utere.* Ni sapueris in tempore, pallentem te jam, & frigidum in terra, ipsum lumen, funeri tuo accensum, vivo emblemate condemnabit.



SYMBOLUM IV.

Facilis benè agendi habitus.

TEXTUS. Constituenda est ergo à nobis Domini Schola servitii: in qua institutione nihil asperum, nihilque grave nos constituturos speramus. Sed & si quid paululum restrictius, dictante æquitatis ratione, propter emendationem vitiorum, & conservationem charitatis processerit, non illico perterritus, refugas viam salutis, quæ non est nisi angusto initio accipienda. Processu verò conversationis, & fidei, dilatato corde **INENARRABILI DULCEDINE** curritur via mandatorum DEI. *Prolog. sub finem.*

4.



EXEGESES.

Sunt Alæ pondus, volucrum corpuscula plumis
 Ordine dispositis quod graviora facit.
 Attamen his usæ facile in sublime feruntur,
 Percelerique via celsa per astra volant.
 Sic vitæ præcepta sacræ primùm aspera, fiunt
 Usu læta brevi, te, velut Ala, levant.



Sperum nomen virtutis, labor disciplinæ terribilis, grave Domini jugum videtur inexpertis. Sed, amabò, gusta, & vide, quàm suavis sit Dominus. Cælum

petis? Brutum exue, & hominem indue, qui solus ad cœlum creatus. Quid æquiùs? Sarcinam pone vitiorum, egredere cœno peccati: illuc enim nihil introibit coinquinatum. Nunquid necesse tibi purgari? Mundum amare desine, & transfer amorem tuum in DEUM; ac propter hunc etiam proximum dilige: solius quippe DEI visione æternùm beandus es. Nōne iustum dignùmque sit, inchoare in terra, quod in cœlo per omne ævum non finies? Sed arduum causaris, edomare bestiales motus, consueta tollere vitia, inolitum Mundi amorem deferere. Ecce! modum & ordinem proficiendi in melius. Eo profice modo, quo antè defeceras. Consuetudo consuetudine vincitur: nihil tam difficile, quod usus non facillimum reddat. Quidquid interim sanctus Legislator tuus paululùm restrictiùs constituit, eidem Æquitas, Emendatio vitæ, & Charitas, ut ait, ita suaferunt. Tibi, ut eadem studiosè serves, necessitas persuadeat. Media sunt ista ad salutem tuam in tuto ponendam: absque his certè votis tuis exigua fides constabit, aut nulla. Alæ sunt ergo hæc præcepta, ad cœlum levantes. Tūne unus absque mediis consequi finem, absque Alis assequi cœlum somniabis?



SYMBOLUM V.

Cœnobitarum genus fortissimum.

TEXTUS. Ad Cœnobitarum fortissimum genus disponendum, adjuvante DEO, veniamus. *Cap. I. de Generib. Monachor.*

5.



EXEGESES.

Nobilis ut fræno Sonipes tutissimus ibit,
 Liber at in præceptis, ausâque dira ruet:
 Sic patiens Rectoris homo geret omnia rectè:
 Sapius at, quisquis se regit ipse, cadet.
 Dux equidem Ratio, facit hanc sed passio cœcam:
 Unde oculis sanum præstat habere Ducem.

Solem ajunt Oculum Mundi, per quem videlicet videt, quisquis videt: cùm tamen ipse non videat. Plurimi hominum domum suam, familiam, Rempublicam integram, immo partem non minimam hujus Mundi gubernant: neque tamen sibi ipsis & unis prudenter moderantur. Aded voluntas affectibus pervertitur, ut rectissimè dixerit Sanctus:

C

Cesset

Cesset Voluntas propria, & non erit infernus. O quàm multiplex est via, quæ videtur hominibus recta, & novissima ejus ducunt ad interitum! Verba sunt Veritatis in carne: *Si cæcus cæco ducatum præstat, nōne ambo in foveam cadunt?* Quàm beata Monachi, in Claustro sub Regula & Abbate militantis, conditio! Cui, si verè Monachus fuerit, neque velle est, neque nolle, adeoque nec errare, nec labi: sed universa vita sua regi, & obsequi. Nemo tam lætus, nemo tam liber curarum: tutior nemo, & nemo felicior. In Duce suum universa recidit moles videndi, quò ducat, & cur ita duxerit, arbitro DEO tuendi. O frænum Religionis, auro contrà sapientibus charum! Hoc qui oderit, & oderit in Claustro, minùs puero sapit.



SYMBOLUM VI.

Prodesse debet, quisquis præest.

TEXTUS. Abbas, qui præesse dignus est Monasterio, semper meminisse debet, quod dicitur, & **NOMEN MAJORIS FACTIS IMPLERE.** *Cap. II. Qualis debeat esse Abbas.*

6.



EXEGESES.

Verba docent, Exempla trabunt : factibile factō
Illico suadebis : gesta gerenda probant.

Sic Aquilæ juvenes natos præeundō tenere

Alta poli, Solis lumina ferre docent.

Tiro beate, cui benè prælegit ore Magister,

Cujus & ex Actis optima quæque legis.

Prima ac præcipua universi Generis humani Schola, contemplari alterutrum, seque mutud imitari. Sic pupuli discunt incedere, loqui, & universum colere corpus : quin & non absimili modo imbuunt animos. Amant namque, & odiunt, quærunt, & fugiunt, appetunt, & respiciunt non tam, quod à Majoribus accipiunt amplectendum,

vel detestandum, quàm quod vident, ipsis vel in deliciis esse, vel contra execratione proscindi. Vis mirifica Exemplo, ut veluti cogat ad sequelam. Unde & Magister ipse Divinus non tam salutis, quàm doctrinæ causâ tanto tempore cum hominibus conversatus, capit facere, & docere. Præcipuè quos alto fortuna vel Gratia loco imposuère, ad se oculos aurisque trahunt. Non secus, quàm Sol calore, ita Princeps quilibet & Rector exemplo bono omnia animat. Sunt namque semper in subditis, quorum hebes & frigidus sensus ad verba salutis haurienda non valet. Sed qui descriptos in corpore, omnique vita Præfulis benè vivendi Canones legere quàm expeditissimè nequeat, vidimus neminem. Quid quodd etiam nulla lex unquam sine vulnere lata est? unde & lædit, gignitque timorem. Contrà verò exemplum Principis nunquam est sine Antidoto lenissimo, revocat fugientem jam spiritum Virtutis, cujus parit amorem. Facili plerumque ac felici opera succedit Imago Virtutis, si in vivum quoddam & animatum prototypon hisce oculis intueri possit, qui eam in semetipso depingit. Nihil itaque Gloriosius egerit Præful, quàm si Aquilam se præbuerit, propriæque Virtutis volatu ad Solem Justitiæ pullos suos provocaverit. Erit Integritas sua filiorum omnium salus, & tanquam à capite sanitas in membra descendet, velut unguentum à capite Aaron in oram vestimenti.




SYMBOLUM VII.

Æqualis omnium amor, & disciplina.

TEXTUS. Non ab eo persona discernatur in Monasterio: Non unus plus ametur, quàm alius, nisi quem in bonis actibus, aut in obedientia invenerit meliorem. - - - ÆQUALIS fiat ab eo omnibus CHARITAS: UNA præbeatur omnibus secundùm merita DISCIPLINA. *Eod. Cap. II.*

7.



EXEGESES.

Lumine consimili Sol aureus adspicit omnes,
 Et nulli rutilum denegat ille jubar.
 Sic pariter Præsul bonus est Pater omnibus idem,
 Et natos omnes censet amore pari.
 Quid cultus dispar nisi murmura livida gignit?
 Par decet affectus conditione pares.

Nihil in aula, nihil in clauastro periculosius primis amoribus. Quem enim illi non efferunt, non extollunt, non inolescere faciunt? Quem non tandem cæteris omnibus reddunt invisum? Indecorum est Rectori, subditum

ditum facere sui cordis Dominum, & nemini favere, neminem audire, qui satrapæ non placet. Scinditur hoc pacto Respublica quælibet. Sunt enim, qui hujusmodi dilectum Domini, cùm apud hunc omnia possit, omni clientelæ abjectissimæ genere demerentur, ut Domini emant favores. Sunt è converso, qui hujusmodi hominem, uno tantùm Regni folio minorem, vatiniano plusquam odio execrantur. Regnum ita in se divisum nonnè desolabitur? Animæ præterea multorum nōne in hoc turbine intestino graviter periclitantur? Solem potius agat, quiscunque regit: æqualiter omnes aspi-
 ciat. Sic dies, sic noctes & sibi, & suis fluent tranquillæ. Nemini præterea, non optimo cuique, non pessimo, disciplinam, curamque remittat. Non optimo: ne fiduciâ existimationis de se conceptæ clanculò malus evadat. Non pessimo: ne desperans de cura sui & affectu, etiam bonus fieri desperet. *Æqualiter omnes, uti DEUS, gubernet pariter DEI Vicarius.*




SYMBOLUM VIII.

Multorum serviendum est moribus.

TEXTUS. Sciat Abbas, quàm difficilem & arduam rem suscepit, regere animas, & MULTORUM SERVIRE MORIBUS. *Eod. Cap. II.*

8.



EXEGESES.

Imparibus firmata seris tu plura recludes
 Ostia, si Clavis sit Geminata tibi.
 Principio major, minor ast in fine, valebit
 Ad portas magnas, exiguasque simul.
 Sic pariter Præsul, multorum moribus aptus,
 Sit facilis facili, difficilique gravis.

ARs artium regere animas. Quot vultus in corporibus diversi, tot genij animorum discreti. Et in his omnibus Arbitrij libertas flectit mentem, quod cupit. Unde nec ullum est sceptrum, quod animæ dominetur. Docere expedit, suadere licet: sed solus in cœlo sedet, qui corda movet. Rectorem te constituerunt? quid ages?

ages? Patris Sancti consilium est, alium quidem blandimentis, alium verò increpationibus, alium suasionibus aggredi. Item indisciplinatos arguere & inquietos: obedientes autem, & mites, & patientes, ut in melius proficiant, obsecrare: negligentes autem & contemnentes increpare, & castigare. Miscere temporibus tempora, terroribus blandimenta, nunc durum Magistri, nunc pium Patris affectum ostendere. Sanctè, & sapienter. Sed artem hanc maximam, ejusque usum tam promptum quàm condignum, solo DEO Magistro didiceris. Absit, ut pede tuo omnes metiaris. Non omnes suavitate Patris proficiunt: non omnes Dominum severum patiuntur. Non omnes umbra virgæ gubernat: non omnes ipsa virga emendat. Repetere itaque clavem cordium ab illo superest, qui finxit singillatim corda nostra.




SYMBOLUM IX.

Animæ ante omnia curandæ.

TEXTUS. Ante omnia ne dissimulans aut parvipendens SALUTEM ANIMARUM sibi commissarum, non plus gerat sollicitudinem de rebus transitoriis, terrenis, atque caducis : sed semper cogitet, quia ANIMAS suscepit regendas, de quibus & RATIONEM REDDITURUS est. *Eod. Cap. II.*

9.



EXEGESES.

Est Honor omnis Onus: spinarum est Infula sertum:
Pastoris tergum propria virga ferit.

Cùm vice sitque DEI, tam summi Muneris omne
Explorat studium lance sagace DEUS.

Crediderat, rursùmque Animas à Præsule poscit,
Exigit & pretium Sanguinis ille sui.

Erribile verbum: Judicium durissimum his, qui præ-
sunt, fiet. Sap. VI. v. 6. Quid porro æquiùs tandem
reposcet Filius DEI, cui Pater omne judicium dedit,
E nisi

nisi Animas, quas emerat Sanguine suo? Tanti non valent, siue *Æs* alienum, quod Præsules dissolverunt, Bona, quæ coëmerunt, Cellaria, quæ impleverunt, Opes, quas cumulârunt, Ecclesiæ, quas decorârunt, *Ædes*, quas construxerunt: siue Munera magnifica, quibus erant spectabiles, Fama celebris, qua incliti fuêre, & si quæ alia sint in ore & oculis hominum magna, sui que Regiminis Fastos Seculares ornantia: Tanti, inquam, hæc omnia non valent, ut Animas, inter hæc forsitan negligentius segniûsque, ac par erat, curatas, in Statera Divini Judicis compensent. Illa Animas ponderat. Si *pellēm pro pelle, & cuncta, quæ habet, dabit homo pro Anima sua.* Job. II. v. 4. Multò magis apud DEUM *omnis ponderatio non erit digna*, uti continentis, sic & pereuntis *Animæ.* Eccli. XXVI. v. 20. Vigilare itaque semper, & dormire, nonnisi pro Animabus, Præsulem convenit: uti & eum, cum quo ille curam Animarum partitur. Prælatus ab ipso fuisti Fratribus? missus Doctor parvulorum ad cathedram? Magister constitutus tironibus? Judex Animarum ordinatus in tribunali Pœnitentiæ? Pastor ovium ruri deputatus? Animas, obsecro, ante omnia noli negligere commissas. Nam & tua pariter Statera, in qua te DEUS appendet, Animas unathecum ponderabit. Cave sollicitus, ne inveniaris minus habens. Mundum si dederis, non exolves, quod debebis.



SYMBOLUM X.

Inobedientium ovium pœna.

TEXTUS. INOBEDIENTIBUS Curæ suæ OVIBUS
POENA sit eis prævalens ipsa MORS. *Eod. Cap. II.*
IO.



EXEGESES.

PAbula, Vox, Baculus gnavi Pastoris Ovile
Si foveant, facilis nulla peribit Ovis.
Sed quæ difficilis bona pascua spernit, & aurem
Occludit, virga nolueritque regi,
Innocuo multum quamvis Pastore gemente,
Præda fit ecce! lupi, cum velit ipsa necem.

Hoc demum est sapere! pulsare Claustrum salutis er-
gò, & ibi volentem perire! Liberum in Claustro vi-
vere vetat vel ipsum nomen. Claudii in eodem, li-
gari, duci, regique non velle, Chymera est. Nunquid ex
Apostolo audivimus dudum: *Obedite Præpositis vestris. Ipsi*
enim pervigilant, quasi rationem pro Animabus vestris red-
dituri: ut cum gaudio hoc faciant, & non gementes. Hoc
enim

enim non expedit vobis. Hebr. XIII. v. 17. Quàm infandus Pastori dolor, pervigilanti, pro suis, si lamentari Domino cum Propheta cogatur: *Iustitiam tuam non abscondi in corde meo: Veritatem tuam, & salutare tuum dixi.* Psal. XXXIX. v. 11. *Ipsi autem contemnentes spreverunt me.* Isa. I. v. 2. Quomodo audet aliquis nostrum, contra stimulum vocantis DEI, impellentis conscientiae, compellentis Legis, contristare Praepositos suos? Correlativa sunt Pater & Filius, Abbas & Monachus, Praepositus & subditus, is demum, qui reddet rationem, & illi, pro quibus redditurus est. Nonne igitur, uti Pastoris vigiliae omnes & somnus esse debent, Oves suas in tuto collocare: ita vicissim Ovium omnium una sit cura, Pastorem audire? Quid poterit aliquando contemptus in Pastore DEUS, cujus voces non ignoras: *Qui vos audit, me audit: qui vos spernit, me spernit: qui autem me spernit, spernit eum, qui misit me,* Luc. X. v. 16. Quid, inquam, poterit contemptus in Pastore DEUS, quid aliud habebit tuâ certè culpâ, nisi ut rideat in interitu tuo? Revertere Sulamitis, revertere!



SYMBOLUM XI.

Mortis quotidiana meditatio.

TEXTUS. XLVI.^{to}. MORTEM quotidie ante oculos SUSPECTAM habere. *Cap. IV. de Instrument. Bonor. Oper.*

II.



EXEGESES.

*V*ivis homo, & totum latè circumspicis Orbem,
In quo sunt votis cuncta minora tuis.

Quidquid habes, majora cupis: geris æmula bella.

Mox tamen, ut moreris, tota cupido jacet.

Mors tibi cæca oculos, dum claudit lumina, sanat:

Toto etenim in Mundo tunc Nihil esse vides.

SChola Mortis verissima omnium, & optima. Huic Magistræ eorum omnium, quæ docet, nemo hominum aliquid negat: ex quo omnes morimur, & sicut aqua dilabimur. Legislator noster beatus Bonorum operum Instrumenta, quorum Officinam Claustra esse pronunciat, præter Mortis jugem Suspicionem, septuaginta adhuc alia
F
ponit.

ponit. Ausim verò dicere, absque Morte foret, nemo bonus esse vellet. Calvariæ syllogismi verè expositorij, argumenta ad hominem. Nullus argumentandi locus, modusque evidentiùs concludit, quàm cryptæ mortuales. Quia tamen hæ nemini effugium ullum permittunt, fugiuntur ipsæ à plerisque: donec Mors repentina superveniens, telo crudeli non urgeat, sed conficiat argumentum. Sic fatui filij hominum! Ad omnia valet Philosophia Mortis. Summa quippe salutis humanæ, contemnere Mundum, concupiscere Cœlum. Sed pro Mundo apud morituros quanta bella! quanti æstus! quantæ contentiones! odia quanta; Hi pro voluptatibus, illi pro opibus, isti pro honoribus, plurimi pro meris opinionibus DEUM ac hominem, Regem ac Legem contemnunt, fortunam, vitam, ac famam prodigunt, Charitatem deferunt, odio tabescunt, quin & hominem exuunt, fitque homo homini lupus. Stulte! hac nocte repetent animam tuam à te: & pro quibus tam flagitiosè contendisti, quid mortui intererunt? Finem acciperet quæcunque tua contentio, quamprimùm animo serio cogitares: modò si morerer, aut quandocunque fuero defunctus, hoc quid curarem? Album an nigrum, curvum an rectum, Petri an Pauli, nihil ad mortuum. Sic cogita, dum maximè ferves: & in ictu oculi totum sopies incendium animi. Verbò, ut rectè omnia videas, quemadmodum calvaria, nihil in omnibus vide.



SYMBOLUM XII.

Obedientia velox.

TEXTUS. Hæc convenit his, qui nihil sibi CHRI-
STO charius aliquid existimant, propter Servi-
tium sanctum, quod professi sunt, seu propter
metum gehennæ, vel Gloriam Vitæ æternæ: sed
mox ut imperatum aliquid à Majore fuerit, Ac si
DIVINITUS IMPERETUR, MORAM PATI nesciunt in
faciendo. *Cap. V. de Obedient.*

I2.



EXEGESES.

*Quàm citò prompta volat pharetra dimissa Sagitta,
Missuræ manui murmura nulla refert,
Sicque volans certò veniet, quò mittitur, iclu:
Sic pariter, sanctè quisquis obedit, agit.
Non trepidat, tardat, queritur, non discutit unquam:
Sed promptè sequitur, consequiturque DEUM.*



Bedire omnes debemus, quia sine DEO ac Domino
esse non possumus, ex quo ipse fecit nos, & non ipsi
nos. *Omnis igitur Anima*, ait Apostolus, *Potestati-*
bus

bus sublimioribus subdita sit, quarum quælibet à DEO est, & vice DEI, licèt ipsa sit homo, homini imperat, rursus alteri homini devota. Ecce! circulum infinitum immensi DEI: quo inaccessibleis omnibus, attamen singulis propè est: & qui videri à nemine potest, auditur nihilominus ab omnibus. Quam igitur debere te DEO libenter fateris Obedientiam, homini, per quem tibi imperat DEUS, quomodo tardas, quomodo trepidas exhibere? Vel tune sis ille, qui oggannire audeas Domino: *Non serviam?* Quin potiùs quærenti DEO: *Quem mittam, & quis ibit nobis?* sagitta velocior, ore & animo responde: *Ecce! ego, mitte me.* Scis, Providentiam DEI in sui dispositione non falli: rectè ergò collimat, quocunque te miserit. Certus verò non impariter esto, neque te unquam fallendum, si tendas, quò DEUS dimiserit. Hic pro Centro gloriam suam habet: tu tuam salutem. Ille nunquam aberrare potest: tu quàm mox, & gravissimè, nisi DEO consentias. Nolis itaque, velis, obedire eidem debes tam promptè, quàm oppidò salvus esse cupis. Pari passu ambulant Salus, & Obedientia tua. Errorem sed forsitan hominis times, tibi moderantis? DEUS eum Capiti tuo imposuit, & regit in te dirigendo. In ipso quoties DEUM ex animo audis, vadem habes omnem Veritatem DEI, sanctè obediendo te nunquam à Centro salutis aberraturum.



SYMBOLUM XIII.

Timor Domini.

TEXTUS. Primus Humilitatis Gradus est, ut
TIMOREM DEI sibi semper ante oculos ponens,
oblivionem omnino fugiat. *Cap. VII. de duodecim
Gradib. Humilitat.*

13.



EXEGESES.

SOL oculus Mundi, prostantia singula lustrans,
Abdita nulla videt, nec tenet astra diu.
Ast Oculus Domini te semper & undique spectat
Intus & exterius, scit studiūque tuum.
Quid cogites, dicas, facias, videt Arbiter æquus:
Hunc Oculum Domini cura, humilisque time.

Timor te Domini nisi humiliet, pavefaciat animo, in-
que cogitatibus, dictis, factisque tuis quàm cautissi-
mum reddat, ferè conclamatum est tecum. Non
frustrà Sapiens: *Initium Sapientiæ Timor Domini.* Nun-
quam sapere incipit, quisquis Oculum Domini negligit. Il-
lius,

lius, inquam, Domini, per quem es, ubicunque es: sine quo neque tu, neque ullus est locus. Illius Domini, qui omnem passionem, affectum, desiderium, & quemlibet motum Cordis tui ante te ipsum intelligit. Illius Domini, cui negare nihil, celare nihil, excusare nihil, vel simulatione, dolo, mendacio palliare, uti apud hominem iudicem potes. Illius Domini, qui non increpat modò, vel pœna brevi, levique in te animadvertere valet: sed qui Arbiter vitæ tuæ, ac mortis liberrimus, nullâ fugâ, nullâ latebrâ, nullâ astutiâ, nullâ potentiâ declinandus, postquam occiderit corpus, potestatem pariter habet, animam mittendi in gehennam, & ardoribus sempiternis vindicandi. Hæc, si sapias, & sentis, viva fide expendes: & verbo meo jam opus non habes. Hoc addo duntaxat: Time Oculum Domini, sed & unicè ama. Hoc etenim teste, uti nullo crimine intento, vel patrato in æternum absolvêris: ita vicissim scelere nullo damnaberis, quod innoxio tibi sæpe numero imputat suspicio, temeritas, malitia, detractio, deceptio hominum. Hoc pariter teste salvum habebis omne bonum tuum: quidquid contrà te æmulantium, invidentium, cavillantium nequitia moliatur. Quàm absonus, qui talem Oculum oderit, quo solo in omnibus adversis unicè licet gaudere! Ambula, Charissime, ambula coram DEO, & esto perfectus.




SYMBOLUM XIV.

Abnegatio propriæ voluntatis.

TEXTUS. Secundus Humilitatis Gradus est, si
 PROPRIAM quis NON AMANS VOLUNTATEM, desi-
 deria sua non delectetur implere. *Eod. Cap. VII.*

14.



EXEGESES.

Ponderibus, multisque rotis hæc machina currit,
 Tempora quæ signat, quæ stata puncta sonat.
 Sed Perpendicularum, ceu primum Mobile, siste,
 Alta rotis mox est ponderibusque quies.
 Est pondus vitium, tua Mobile sola Voluntas:
 Hanc, ne unquam pecces, sistere ferto DEUM.

Dilatavit infernus animam suam, & aperuit os suum
 absque ullo termino. Isa. V. v. 14. Sicut oves in in-
 ferno positi sunt. Psalm. XLVIII. v. 15. Quid, obse-
 cro, est, quod Infernum tam horribiliter inflat? quod instar
 armentorum miseros homines in sulphuream hanc paludem
 præ-

præcipitat? Verbô dicam: Propriæ Amor Voluntatis, detrectatio Divinæ. *Anima, quæ peccaverit, ipsa morietur.* Ezech. XVIII. v. 4. Sed nemo peccat, nisi propria voluntate. Flagitiosum nihil, nihil scelestum, culpam nihil omnino habet, tibi non volitum. *Proni sunt sensus hominis in malum ab adolescentia sua: Caro concupiscit adversus spiritum: Mundus totus in maligno positus est: Inimici hominis domestici ejus: Adversarius noster diabolus tanquam Leo rugiens circuit, quærens, quem devoret.* Ecce pondera, ecce rotas horologij infernalis. Sed absit Perpendiculus; primum Mobile Voluntas tua timore DEI, ejusque præceptis sistatur: nunquam horologium istud incedet, nunquam curret, nunquam à te peccabitur. Trahere possunt hæc pondera, impellere possunt hæc rotæ, sed cogere nequeunt, cavente Domino, qui Fidelis est DEUS, & neminem tentari permittit supra id, quod potest. Velle itaque, ac nolle tuum fac velle & nolle DEI. Sic utrûmque sanctum reddes, nihilominus verò tuum. Si namque cum bono DEO consenseris gratiâ suâ, à te non repulsâ, Voluntas tua clavem cœli subibit. Neque enim DEUS, qui te liberum voluit, absque tua te Voluntate damnabit, neque salvabit. Merita tua vel pœna, vel præmium exspectat. Vide, quantum tuâ intersit, propriam Voluntatem, ex se non nisi malè mobilem, labique potentem, figere per Divinam, ut firma in bono consistat, atque ad Cœlum attollatur.



SYMBOLUM XV.

Conditiones sanctæ Obedientiæ.

TEXTUS. Tertius Humilitatis Gradus est, ut quis PRO DEI AMORE OMNI OBEDIENTIA SE SUBDAT MAJORI. *Eod. Cap. VII.*

15.



EXEGESES.

UNo duntaxat quia puncto Sphæra moratur,
 Mobilis ad nutum est, perfacilique gyro.
 Vel digito cedens, subitos agitatur in orbes:
 Cui similis, quisquis iussa paratus agit.
 Sic age: sit Punctum, quo verteris, atque quiescis,
 Solus, quem colis in Patre iubente, DEUS.

Propriæ Voluntatis perniciem nihil felicius prævertit præ
 sancta Claustri Obedientia, si ibidem DEO, non ti-
 bi obtemperes. Cautè vide, tu quid agas. DEUM,
 quem ipsum audire nequis, loquentem tibi habes in Superio-
 re: & hunc ipse ordinat, ipse illuminat, atque sanctè profes-
 sus, se in ipso audiri, vel sperni. Ergo ut DEO in Superiore
 H obe-

obedias, obaudire huic necesse est, quia DEI interpreti, quia DEI electo, quia DEI voluntate tibi prælato. Sin verò obtemperes Prælato, quia Seni, quia sapienti, quia pio, quia docto, quia affabili, quia mansueto, vel qualitercunque præcellenti: edic, quem audis, nisi tuo iudicio, tua exquisitione probatum? Sanè hic DEUS in causa obediendi non est. Pertinebit olim hoc pacto ad te illud Prophetæ: *Seminâstis multum, intulistis parum.* Agis quod vanus ille, qui Crucifixi imaginem artis ac pretij causâ veneraretur, non quia Christi est. Vera Obedientia formam capit ex eo solummodo, si apud te DEUS in causa sit. Atque hac demum ratione fiet, ut verè pro DEI amore omni obedientia te subdas omni Majori. *Pro DEI amore*: non timore pœnæ, tædio correptionis, verecundia confusionis, cupiditate favoris, desiderio laudis, studio promotionis, & ne solo quidem ductu atque facilitate naturæ. *Omni obedientia*: nullo videlicet genere parendi, nullo tempore, nullo loco excluso, siue communia, siue privata, siue commoda siue incommoda Genio tuo, siue gravia, siue levia viribus tuis imperia fuerint. *Omni Majori*: nempe juveni, vel seni, magis docto vel minus, affabili vel moroso, facili vel difficili. *Ultrò* adhæc, & *libenter*: non blandimentis illectus, non deliberatione, discussione, propriique iudicii tui approbatione prævia inductus, non minis compulsus, non simulatione vel dolo compositus, nullo murmure, nulla animi indignatione turbatus. Ecce! quot vulpeculæ parvulæ demolientes veræ Regularis Obedientiæ vineam. Cape illas sollicitè, & mobilis esto ad nutum: uno DEO vertere, atque quiesce. Ni feceris, acerbam DEO pœnam dabis rebellionem corporis tui, quod inobedienti tibi nunquam obedi-
et.



SYMBOLUM XVI.

Obedientia inter dura.

TEXTUS. Quartus Humilitatis Gradus est, si in ipsa Obedientia duris & contrariis rebus, vel etiam quibuslibet irrogatis injuriis TACITA CONSCIENTIA PATIENTIAM amplectatur. *Eod. Cap. VII.*

16.



EXEGESES.

Pulchrum est, sed durum Marmor scalproque resistit,
Artificis lassans saepe labore manus.

Dedolet, & tundat, sculpat, poliâtque Magister,
Lumina si Paridis marmore comta cupit.

Icone Virtutis non est speciosior ulla:

Sed quia tu Marmor, tundere teque decet.

Era quàm facilè artifici cedit, tam difficillimè marmor.
Fecit nobis natura cor carneum: at verò congenitus
concupiscentiæ fomes lethali calore suo ô quoties illud
sic urit, ita exsiccat, ut planè in lapidem indurescat! Mundum
itaque cor tuum, rectum, & sanctum ut fiat, tunstionibus mul-

SYMBOLUM XVII.

Humilis confessio peccati.

TEXTUS. Quintus Humilitatis Gradus est, si omnes cogitationes malas, cordi suo advenientes, vel mala absconsè à se commissa, per HUMILEM CONFENSIONEM Abbati non celaverit suo. *Eod. Cap. VII.*

17.



EXEGESES.

Ceu, transparenti quæ clausa est Vipera vitro,
Panditur, & tegitur: quo patet, inde latet.
Sic humilis quotquot Confessio menda revelat,
Tot simul & celat, non nisi nota Patri.
Sed satis est, ea nôsse Patrem, qui prompta veneno
Pharmaca suppeditat, sic tribuente DEO.

Omnes peccaverunt, & egent Gloria DEI, Romanis agebat Apostolus Cap. III. v. 23. Multò autem disertius omnibus nobis & malum nostrum, & medicinam saluberrimam retexit Dilectus Domini Discipulus I. Joann. I. v. 8. & 9.

& 9. *Si dixerimus, quoniam peccatum non habemus, ipsi nos seducimus, & Veritas in nobis non est. Sed si confiteamur peccata nostra, fidelis est (videlicet DEUS) & justus, ut remittat nobis peccata nostra, & emundet nos ab omni iniquitate.* Ecce! paludem, qua foedamur: ecce! balneum, quo lavamur. Nunquid ipse Dominus se Patrem amantissimum professus est, qui recipit omnem filium prodigum, & pœnitentem primâ etiam stolâ dignatur? Celer accurrit, ut erigat lapsum: brachia extendit, ut amplectatur contritum: oscula expedit, ut amore liniat vulneratum: stolam primam procurat, ut verecundum convestiat: vitulum jubet saginatum parari, ut mœrore tabescentem confortet. Et surgere tardas, atque ire ad Patrem tuum? Ah! ne horre, ne fuge, ne time Confessionis tribunal. Ibi Domus est Patris, quem dixi: ibi pedes ejus veloces: ibi brachia, ibi oscula ejus: ibi stola, ibi vitulus. Ast, inquis, homo ibi sedet, coram quo erubescō, de cujus affectu suspicor, cujus virgam & baculum vereor. O timor, ubi non est timor! Nihil benignius, sapientius nihil, quàm quoddam hominem Judicem tibi dederit DEUS. Quem olim Filius DEI de diabolo & Angelis ejus statuit triumphum, etiamnum referri decrevit. *Arte artem fallebat, hostemque nostrum non per seipsum, sed per hominem, quem assumit, aggressus est.* Vult ergo & hodie, virtute Clavium homini concessa, te per hominem carcere dæmonis manumitti. Præterea quemadmodum ipse *factus est Pontifex noster, circumdatus infirmitate, ut sciret compati infirmitatibus nostris:* ita & tibi peccatori Judicem statuit hominem peccatorem, qui priorum vulnerum rubore confusus, cum omni verecundia alligaret vulnera tua. Et confunderis apud eum pro anima tua dicere verum? Peccatorem te esse nôrunt omnes, quotquot te hominem nôrunt. Cur ergo te talem fateri tu nolis coram uno & solo? Anne ignoras, apud eum, DEO, Ecclesia, Lege, Charitate, Conscientia propria, quin & pœna fatali districtim prohibentibûs, omnia tua, quæ revelante te sciet, fore veluti omnia, quæ nescit? Soli diabolo patet, ea cognita esse Sacerdoti: sed & uni diabolo nocet.

Negotia etenim ejus, uti furis, in tenebris perambulant.

Prodidisse eundem, fugâsse est.



SYMBOLUM XVIII.

Paupertas corporis & spiritus.

TEXTUS. Sextus Humilitatis Gradus est, si OMNI VILITATE vel extremitate contentus sit Monachus, & ad omnia, quæ sibi injunguntur, VELUT OPERARIUM MALUM ET INDIGNUM se judicet. *Eod. Cap. VII.*

18.



EXEGESES.


PYramidis velut altus apex, pede confitus amplo,
 Hoc magè rarefcit, quò magè celsa petit.
 Sic proprioze via Cali ad sublimia surgit,
 Qui vitæ cultu pauperiore riget.
 Vilia si corpus patitur Mens grandia nulla
 Si cogitet, rectâ pergis ad astra viâ.



Terna qui cupit, terrena fastidiat. Quo etenim pacto Montem tu celsum conscendere simul, ab eoque descendere passibus iisdem confidas? Interim neque æterna, neque terrena sine cura obtinentur: utrisque autem

sedulò procurandis mens una non sufficit. Opes, & honores ô quàm fallacia bona, quanto labore quæruntur? qua cura petunt servari? quo dolore perduntur? Hos inter labores, inter has curas, & his in doloribus ubi, amabò, cælestium meditatio, consuetudo, & habitus locum reperiunt? Sine his verò æterna in æternum non capies. *Ubi est thesaurus tuus, ibi est & cor tuum*, vade ipsa veritate *Math. VI. v 21*. Nemo itaque sapientum crediderit unquam, quidquid ore, vultuque, & habitu corporis tui exterius prætetuleris, si thesaurizes in terra, te amare cælestia: quæ homo excors non reperit. Quàm igitur æqua, quàm necessaria, quàm tuta est paupertas corporis ac spiritus! Si sapias, Matrem tibi eam assume. Delectare in ea, dum sentis, dum actu deficiis rebus multis, quibûs egeres. Quære eam, quoties abundas, & ultro procura, ut eam sentias. Vilia dilige, ut nobilem in te spiritum probes. Nemo nobilis, cui non Mundus universus vilescit. Legisti in Psalmis: *Omnia subiecisti sub pedibus ejus*. Mundus est, quem tibi subjecit DEUS. Locus ejus, ipso ordinante, sit sub pedibus tuis. O quàm vilis, qui non nisi calcandus! Creaturas idem condidit pro te DEUS, iisque tibi scalam ad cælum construxit. Nunquam verò per eas ad cælum conscendes, nisi, quemadmodum gradus in scala, easdem sancto contemptu quasi pedibus contriveris. Cælum Mons altus: ergò sarcinas abjice. Porta ejus angusta: ne fartus distentusque ad illam accede. Lepida capita, qui faciunt secus. Meritò illa dæmones, homines, Angeli, & ipse DEUS derident. Pyramis esto, & indies rarefice pauperiore corporis cultu, ampliore spiritus in terrenorum desideriis inopia. Sic tuæ colossus Gloriæ con-

strues: ita apicem obtinebis virtutis: hoc demùm pacto
gracile caput tuum nubibus
inferes.



SYMBOLUM XIX.

Humilitas linguæ , & animi.

TEXTUS. Septimus Humilitatis Gradus est, si OMNIBUS SE INFERIOREM & vilio rem non solum LINGUA SUA pronunciet, sed etiam INTIMO CRE- DAT CORDIS AFFECTU. *Eod. Cap. VII.*

19.



EXEGESES.

QUamlibet è numeris qui Summam condere novit,
 Effari nescit, si mera nulla notes.
 Omnia, quæ tua sunt, homo, quid sunt? omnia nulla:
 Ex nihilo siquidem factus es ipse nihil.
 Et cur alga tumes, aut si quid vilius algâ?
 Sunt bona nulla tua: ast crimina sola tua.

CAnone hominum, quod quis per alium facit, per se ipsum facere censetur. Quidcunque ergo demum facit homo, & valet, facit per eum DEUS, cujus Verbum Veritatis est: *Sine me nihil potestis facere.* Peccatum excipe, quod effectus non est, sed defectus. Edissere jam
 K magni

magni spiritus homo, qui digito amas monstrari, & dicier: *Hic est*: quid magni aliquando per te fecit DEUS, quod non æquè per quemlibet fratrum tuorum facere vel potuisset, aut posset? Non porrò fecit, vel faciet, non quia tibi, sed quia sibi non libuit. In omnem ergo peccas philosophiam, dum vel uni te præfers: quia parium pariformis est ratio. Nihil certè in omni facultate tua reperies, quod verè sit tuum, nisi aptitudinem DEO ad opera sua deserviendi. Sed uti hanc ipsam in te contulit DEUS, ita hominum cuilibet sive tribuit, sive tribuere nullo negotio, nutu unico poterat. Quid igitur in affabilitate, amœnitate morum, ingenio, eloquentia, scientia, prudentia, vel Virtute tua quacunque, aut quantacunque demùm prorsus insipidè complaces tibi? Tua hæc sunt? *Quid est, quod non acceperis?* Si verò accepisti, quid gloriaris, quasi non acceperis? Esto, te lumina multa circumstent: Cœlum imitare, innumeris Sideribus coruscum. Considera illud in meridie: nōne in eo Stellæ ad unam se omnes splendente Sole occultant? Ita & tu operantem in te DEUM semper & undique magnificans, nihil ex omnibus, quæcunque aut effecit, vel efficit per te DEUS, tibi tribue. Noli desipere, ut cum pavone in speculis caudæ tuæ, jactanter & fastuosè explicatæ, superbias. Hæc sit philosophia tua, sana omni ratione subnixa: *Nihil sum ex genere meo, de nihilo gratis à DEO factus: Nihilo interim nihil debetur.* Taliter si discurras, uti aliter ex vero non potes, tam promptum tibi erit, quàm æquum, ut omnibus te inferiorem & viliozem non solum lingua tua, nequiter se forsitan humiliante, pronuncies, verùm etiam intimo credas cordis affectu. *Nulla mera* apud te invenies, si bona quæsieris: si mala pervestigaveris, innumera illa, & sola tua.



SYMBOLUM XX.

Vita Communis.

TEXTUS. Octavus Humilitatis Gradus est, si nihil agat Monachus, nisi quod communis MONASTERIJ REGULA, vel Majorum cohortantur exempla. *Eod. Cap. VII.*

20.



EXEGESES.

ORgana concentu resonent ut suavia grato,
Diffimili fallat fistula nulla sono.

*Quisquis es in media Fratrum, vivisque Corona,
Undique te paribus reddere disce parem.*

*Quod grave, quodque leve est, communi lege statutum,
Concordi studio promptus ubique subi.*

Iucundum Charitas Organum, ubiubi Fratrum est Chorus. Dulcibus ejusdem modulis mirè lætantur DEUS, & homines. Artifex ejus Concordia Animorum, & morum. Mox porrò ut mores diversi, fiunt & dispares Animi. Humeris paribus onus quodlibet facile fertur: imparibus

tam grave , quàm invisum evadit. Communis Legis justitia , dum æquissimè dividit , bellè omnia membra conjungit. Contrà verò voluntas & exquisitio propria fallaci statera dolosè partitur , perniciosissimè separat. Nunquam æmulatio , invidia , murmur , pestes charitatis , promptiùs in animos subeunt , quàm ubi unius legis sacramento devoti , unius observantiæ studio dissident. Grave vel modestissimis accidit , multos habere socios commodorum , disciplinæ & onerum paucos. Hanc stragem Charitatis inultam non finet DEUS, qui charitas est. Deficere citiùs assolent , qui sibi ampliùs parcunt. Sedulos labor confortat , & desides otium frangit. Gemma nobilis , decus illustre , utilitas maxima Gremij Regularis Vita Communis ex instituto legis , pio majorum exemplo probata : ubi spherica omnia æqualiter uni Centro , sine angulo , sine singularitate respondent. Cave sis autem , Vitam Communem dixeris circum illum vitiosum , quem discoli faciunt ; ne Charitatem appelles consensum exerrantium animorum in dissolutione legum. Sola communio regulæ , in quam jurasti , te benè consonam fistulam probat Organi Regularis : cui si dissonantiâ tuâ nullum vitium feceris , eris & tu inter illos , qui modò jucundè in Via , multò verò jucundiùs olim in patria DEUM suum & laudant , sempérque laudabunt in tympano & Choro , in Chordis & Organo , in cymbalis benè sonantibus , in cymbalis jubilationis.



SYMBOLUM XXI.

Taciturnitatis Studium.

TEXTUS. Nonus Humilitatis Gradus est, si Linguam ad loquendum prohibeat Monachus, & **TACITURNITATEM** habens, usque ad interrogationem non loquatur. *Eod. Cap. VII.*

21.



EXEGESES.

Fistula dulcè canens uti tantùm inflata sonabit,
Sed nullo flatu sollicitata filet:
Sic mos est humilis. Tacet, usque ubi verba reposcit:
Nam linguae facilis crimina crebra pavet.
Non hæc est Virtus, non hæc cautela superbi:
Solibus hic totis Garrulus anser adest.

Quam verè Sapiens dixerit, ipso Spiritu Sancto edoctus: *In multiloquio non deerit peccatum:* vel soli superbi, quibus nemo eloquentiâ anteit, ad oculum demonstrant. Quidquid peccant, promptissimè excusant. Si arguantur, disertissimi in causa sua Cicerones procul-

culpa sua, semper cum verborum triumpho perorant. Si benè egisse se putent, illicò glocitant cum Gallinis, & ova sua universis annunciant. In aliorum Res omnes indagant, quoniam se iudices omnium constituunt. Quæstione docta suborta extemplò Cathedram occupant, & ante omnes definiunt, ut Magistros intelligas. De Virtutibus incidit sermo? extempore Panegyres fundunt, ut ex abundantia cordis os suum loqui credatur. Dum de vitiis differitur, in ea tam vehementer, tam latissimè invehunt, quasi toto corde suo omnia crimina exulent. Mox ut alij laudantur, frendent intra se, non patientes, sibi quemquam præferri, & ironiis, sarcasmis, omnique malè interpretandi, extenuandique genere abundant. Contemni si quempiam audiant, tum demum rota currit eorum, scenámque Pharisei adversus Publicanum dexterrimè instruunt. In epulis, conventiculis, deambulationibus, sales, & jocos, vexas & sannas absque modo & ordine spargunt, tanquam semper in Domino gaudeant, sitque mens sua, criminis secura, quasi jure convivium. Nihil tam providè disponit Superior, in quo illi non meliùs sapuissent. Nemo cæterorum officij sui partes tam ritè exequitur, ut ei desidiam, socordiamque non exprobrent. O fistulæ animatæ, molestissimè semper strepentes, quia à seipsis inflatæ! Non sic humilis frater, non sic: qui usque ad interrogationem non loquitur. Sæpe quidem revera erratur à multis: neque humili judicium deest errorum. Ast ipse perpetuo sibi dicit in corde suo: Quis te iudicem Prælati tui, Superiorum tuorum, fratrum tuorum constituit? Christo, quo nihil sibi charius est, obaudit, sibi-que dictum existimat, quod Petro, ineptè sciscitanti: *Hic autem quid?* illico reposuit Dominus: *Quid ad te? tu me sequere.* Ecce! fistulam dulcem atque gratiosissimam, quæ nisi ab alio inflata, non sonat.



SYMBOLUM XXII.

Continentia risûs.

TEXTUS. Decimus Humilitatis Gradus est, si non sit facilis ac promptus in risu : quia scriptum est : Stultus in risu exaltat Vocem suam. *Eod. Cap. VII.*

22.



EXEGESES.

DUm laqueos tendit, mortem jam præparat auceps,
Ecce ! ignara mali ludicra cantat avis.

*Mente caret volucris : verùm ratione serenus
Mortibus in tantis quomodo ridet homo ?*

*Qui laqueos novit , qui retia pensitat , atque
Mille pericla timet , tempus in omne fleat.*

Hilarem utique datorem diligit **DEUS**, teste Propheta, atque gaudere in Domino semper nos omnes Apostolus iussit. Risus verò facilis & jugis, maximè excus-
sus, non est Hilaritas dilecta DEO, neque Gaudium in Do-
mino. Secùs Veritas ipsa non dixisset : *Væ vobis , qui ride-*

tis, quia lugebitis. Stultum probat risus multus: qui neque viam, neque Gradum suum intelligit. Via tua præsens hæc Vita: quam in singula momenta ducis incertam, Gratia nunquam securam, tentationibus nunquam liberam, lapsibus undequaque expositam. Tu verò sic fatuus es, ut omnium horum incurius, cum avicula statim jugulanda cantilles, & rideas? Gradus tuus in claustro, flere tua, flere aliorum peccata, te Mundo, tibi Mundum crucifigere, mortificari tota die, æstimari sicut ovem occisionis. Et ridere tam promptè tibi vacat? Hæc omnia nisi insuper habeat superbia tua, & fatuitas tua undequaque deliret, tristabere potius secundum DEUM, ut tristitia tua convertatur in gaudium: in solo DEO gaudebis, & congaudebis in eo gaudentibus. A Seculi porro tam risibus, quàm actibus, te semper præstabis alienum. Sed nolim, ais, tristitia exedat cor meum, vel verò humor melancholicus ante tempus depascat viscera mea. Rectè omnino vis: at verò planè perperam, ut audio, sentis. Nequaquam enim tristitia, quæ secundum DEUM est, exedit cor, vel Gaudium in Domino lethaliter, uti tu putas, in viscera sævit. Finem utriusque, non verò principium spectat. Omnis voluptas, quæ secundum seculum est, blandè equidem intrat: sed in fine mordet ut coluber. Quantum te usus delectat, tantum certissimè post usum te pœnitebit. Sape cum illo, qui dixit: *Tanti non emo pœnitere.* Exploratissima gnoma: *Voluptatem vicisse* voluptas est maxima. Hanc porro victoriam refert Tristitia, quæ secundum DEUM est. Et cor tibi exedere videtur? Gaudium deinde in Domino quid est, nisi condelectari legi DEI, immaculatum se præstare ab hoc Sæculo, mundum servare ab omni iniquitate? Sic porro secura mens criminis revera quasi jûge convivium. Utut se foris contineat hoc gaudium intra omnis modestiæ limites, intus tamen in corde se semper & undique jucundissimè diffundit per Spiritum sanctum. Et ab eo tuis visceribus metuis? Cura, obsecro, omnique studio procura, ut hunc tibi risum faciat Dominus. O quàm illico tibi stultus omnis Seculi risus desipiet!



SYMBOLUM XXIII.

Modestia Vocis.

TEXTUS. Undecimus Humilitatis Gradus est, si, cum loquitur Monachus, leniter, & sine risu, humiliter, & cum gravitate, vel pauca verba, & rationabilia loquatur, & non sit CLAMOSUS IN VOCE. Eod. Cap. VII.

23.



EXEGESES.

UT fluvius cursu leni delabitur ingens,
 Rivulus at modicus murmurat atque strepit.
 Sic, quotquot sapiunt, pauca & moderata loquuntur,
 Mentis inops clamat, verbáque solus habet.
 Pandit nempe suum per verba superbia fastum:
 Discere vult humilis, nonque docere cupit.

N Acilè largior, tempus esse loquendi, & tempus tacendi, quod Sapiens ait. Sed quantò securius est filere, quam loqui? Verba animi cordisque nostri apud sapientem proditores certissimi, quantumcumque illa componere molia-

ris. Ut videre , ubi aliàs videri non potes , fatis est , si loquaris. Quòd si non expedit , cæteros nosse , quid animo verses : & hoc ipsum sit illud secretum , quod præter se soli tibi DEUS servavit : an sapias , si garrulo clamore te ipsum divulges ? Hoc si DEUS probasset , ut Aures , sic linguam tibi geminam contulisset. Sed neque hanc unicam , quam dedit , labiorum ac dentium veluti muro , & antemurali clausisset. Tua sententia DEUS & Natura nihil faciunt frustra. Crede , quia linguam tuam idè sepiunt ampliùs , ut à malo te tantò cautiùs retrahant. Noli esse stultus , ut sis sapiens tibi metipsi , contrà , quàm sapit , & instruit DEUS. *Qui verbo non offendit , hic perfectus est Vir.* Pauca igitur , & rationabilia loquere , leniter & humiliter : ut paucis verbis magnam in te animam probes. Verba quid sunt nisi verba ? quòd abeunt nisi in ventum ? Et his tuam Gloriam credes ? Time , ne inanem verborum tuorum pompam inaudiens , animo tuo apud se scribat hanc dicam : *Tinnit , inanis est.* Qui omnia est , humilis certè non est , quamdiu verbis turgescit. Quem porrò Humilitas destituit , nulla incolit Virtus. Univerſa enim Virtutum solidarum celsissima fabrica nititur fundamento Humilitatis. Ergò sape , & ut sapere credaris , verbis innotesce paucis.



SYMBOLUM XXIV.

Compositio Oculorum, & totius corporis.

TEXTUS. Duodecimus Humilitatis Gradus est, si non ipso solùm corde Monachus, sed etiam CORPORE HUMILITATEM videntibus se semper indicet - - - inclinato sit semper capite, DEFIXIS IN TERRAM ASPECTIBUS &c. *Eod. Cap. VII.*

24.



EXEGESES.

Quidquid in orbe rei est, Oculus videt, indeque monstrat
 Occultæ Menti, mōxque cupido furit.
 Quàm justum, si figis humi, si lumina claudis:
 Clauditur hinc multæ dupla fenestra neci.
 Plurima si nunquam vidisses, plurima nunquam
 Patrâsses, plectet quæ gravis ira DEI.



Oculi scopuli! quàm subitò, quàm fortiter animos irritatis! Segniùs irritant animos demissâ per aures, quàm quæ sunt oculis subjecta fidelibus. Quis Mundum, & omne, quod in Mundo est, amaret, nisi videret?

Mirum illud Prophetæ patientis: *Pepigi fœdus cum oculis meis, ut ne cogitarem quidem de Virgine.* Job. 31. 1. Quare non ait, ut ne viderem quidem Virginem? Nimirum vidisse jam cogitasse est. Sensuum velocior, acutior, vehementior nullus præ Oculo. Illic animæ monstrat, quod videt, fomes universæ cupidinis. Et cohiberi non debet, si perire nolimus? Da gloriam DEO, atque liberè fateare: anne, oculus liber animam tuam virginem esse finit? anne Sponsam DEI? Illi caro & sanguis, huic uniuscujusque creaturæ affectus vitium facit. Virgo continens esse debet animo & corpore: Sponsa verò DEI nihil omnino amare debet, nisi in DEO. Porro oculi liberi in creaturas dispersi, dum oras, & psallis, nonne devotionem tibi furantur? Oculi liberi in cellis aliorum, in tabernis, & nundinis nunquid paupertatem apud te jugulant? Oculi liberi in mensa nonne Sacræ Lectionis fructum evacuant, gulam fovant, æmulationem, invidiam, zelumque pessimum facile pariunt? Oculi liberi in claustro nonne sacrosanctum silentium rumpunt, ora dissolvunt? Oculi liberi in Superiores conjecti, quos audire jam sufficit, videre non opus est, nonne Obedientiam solvunt, si quid fortè humani aliquando coram te patiantur? Oculi liberi in omnes passim intenti nonne suspicionibus, judiciis temeris, ira, indignatione omnem tibi animam turbant? Et prædones hos pessimos ad humum non damnas? Vide, sed intra te vide, quid Rerum agatur? Conscientiam inspicere, scelera, crimina, menda sic vide, ut horreas: sic perhorresce, ut quantocyus lachrymis deleas: sic dele, ut nunquam deinceps admittas. Præterea quæ supra te sunt, & quæ infra te, vide, præmia nempe & supplicia, horumque arbitrum, qui venturus est, Judicem DEUM. Ita sanctè non videns, & videns, invenies gratiam in oculis Domini, qui te undique videt.



SYMBOLUM XXV.

Concordia cordis & oris in Psalmodia.

TEXTUS. Consideremus, qualiter oporteat nos in conspectu Divinitatis & Angelorum esse. Et sic itemus ad psallendum, ut **MENS** nostra **CONCORDET** VOCI nostræ. *Cap. XIX. de Disciplina psallendi.*

25.



EXEGESES.

Nemo est, qui grato Thuris non gaudet odore:
Nec tamen id redolet, ni prius igne calet.
Gratior ast omni fervens Oratio thure,
Nubila despiciens pergit ad usque DEUM.
Ut placeat, faciet Concordia Mentis, & Oris:
Munera Mens flammæ, Vox tua thuris agat.

Non ullum Orationis perfectius & elegantius aliquando Symbolum præ thure concipias. Quidquid in eo spectes, disciplinæ est. Thus inter Gummata computatum, ex arboribus nobilibus stillat. Oratio quælibet sancta

vix potest esse concepta, nisi à Justo, qui erat tanquam Lignum plantatum secus decursus aquarum, dabátque fructum in tempore suo. Thus, quamvis odoris gratiâ nonnunquam adhibeatur in domibus, attamen honoris causâ solo in Templo, Domo videlicet DEI adoletur. Oratio semper ad DEUM, etiam dum in honore Sanctorum oramus, dirigi debet: qui & in se, & in Sanctis suis laudandus. Thus imponimus thuribulo: Orationi deditâ operâ semper intentio sancta præmittenda, ut in DEUM directâ sit. Thus ardentibus prunis injicitur: Oratio cordi, summa devotione accenso, tanquam igni superimponitur. Thus è profundo fursum ascendit: Oratio cum humilitate perfecta cordis contriti inchoanda, & proseguenda est. Justus námque in principio orationis accusator est sui. Thus fumo redolente rectâ Cælum petit: Oratio Justi penetrat nubes. Thus miro odore diffusum, totam domum suavitatem perungit. Oratio devota gratus odor Altissimi, gratiæ ejus thesauros Bonitatis infinitæ refert ei, qui petit, & iis, pro quibus interpellat. Redolet itaque in Cælo: redolet in omni Ecclesia: redolet in purgantibus flammis. Thus denique fragrantia sua malum quemlibet fœtorem dispellit. Oratio devota orantem pro vitiis suis compungit, scelerum fœtorem abigit, languorem excitat, graveolentiam immodestiæ & scurrilitatis quantocyus dissipat. Ast verò hoc totum à Thure agitur, si ardeat: ab Oratione, si ferveat. Ignem subtrahe thuri: non fragrat, non fumat. Fervorem deme Orationi: non placet, non impetrat. Utinam non fiat in peccatum.



SYMBOLUM XXVI.

Reverentia Orationis.

TEXTUS. Si, cùm hominibus potentibus volumus aliqua suggerere, non præsумimus, nisi cum humilitate & reverentia: quantò magis Domino DEO universorum cum OMNI HUMILITATIS DEVOTIONE supplicandum est? *Cap. XX. de Reverent. Orat.*

26.



EXEGESES.

Garrula non laudat, sed Templum turbat hirundo,
 Dum cantando volat, dum revolâtque frequens.
 Oratûm veniens ni mentem colligat omnem,
 Spontèque dispergat, despicit ille DEUM.
 Quæ sit Majestas, quàm sitque tremenda, revolve,
 Cui loqueris: quàm sis tu miser, æger, inops.

Nunc concivi tuo, ne Principi & Domino dicam, dum
 ei loqueris, tergum tuum, psittaco verò, simiæ, can-
 ni, feliculo faciem obvertis? minimè gentium, ais.
 N 2 Eccur

Eccur itaque DEO ac Domino Exercituum, Regi Seculorum immortalī loquens in oratione, mente tua, non, quando illa se tibi pro fragilitate tua ad modicum furripit, sed mente, quam nunquam in DEUM collegisti, extra illum omnia cogitas? Non porro collegisse te videt, quisquis te videt garrulum & ridiculum accedere pariter, & recedere ab oratione. An credis, an times Majestatem, quā adorare te simulas? Ut ores, & ores sine intermissione, cum fide & tremore, te cogit, quia factus es ad gloriam DEI. Ubi apud te honor ipsius? Cogit te, quia sine illo nil habes, nil potes, nil tenes, nil accipis: quia reus es, venia egens, infirmus, medicamine sanandus, pauper, stipe sustentandus. Ubi auxilium tuum opportunum? Cogit te, quia Eleemofina Fundatorum ideo vivis sine cura & labore, ut vacet tibi, orare DEUM, & exorare pro omni provincia, quæ panem cum sudore tibi interea ferit, & metit. Ubi spes hæc, ubi fructus hic patriæ? Cogit te tandem, quia de clero, de ordine Sacerdotum es, quibus incumbit ex munere suo, imbecilles populi preces sustentare, mediatores agere peccantium, Advocatos apud DEUM se miseris, & afflictis præbere. Ubi hæc officia tua? Tūne blandiaris, sive veriùs mentiaris tibi, in tanta Orationis tuæ deliberata irreverentia pertinere ad te illud *Ecclesiastici* Cap. XXXV. v. 20. *Qui adorat DEUM in oblatione* (alacriter, nimirum, reverenter, sanctè, atque hilariter) *suscipietur, & deprecatio illius usque ad nubes propinquabit.* Nōne metuas potiùs, cū alioquin propter Gradum tuum tam longè supra populum à DEO elevatus sis, nihilominus tua culpa te stare in populo illo, de quo Dominus conquestus est *Math. XV. v. 8. Hic populus labiis me honorat, cor autem eorum longè est à me.* Inspice hirundines in templo insolescentes, & vel tibi invisas, mentisque tuæ deditæ, vel inertissimâ operâ dissolutionem viva quadam imagine depictam erubescere. Vivis de Altari: ergo & servias Altari ea cum reverentia, quæ decet Dominum Altaris.



SYMBOLUM XXVII.

Cura fratrum delinquentium.

TEXTUS. Omni sollicitudine curam gerat Abbas CIRCA DELINQUENTES FRATRES : quia non est opus sanis Medicus, sed malè habentibus. Cap. XXVII.

27.



EXEGESES.

ARbor ubi vitium ramo fors fecerit uno,
Hunc Resecas: superest illa, virétque magis.
Frater ubi peccat, Patris est Fratrúmque juvare,
Ferréque collapsó, quò citò surgat, opem.
Gratia spondenda est: ut supplicet ille, monendus.
Quærite quæ periit, ne juguletis ovem.

Afflicto ne addas afflictionem, Humanitas, Charitas,
Lex, Evangelium jubent. Corde porrò pœnitentis
quid magis afflictum? Hujusmodi hominem abundan-
tiori tristitiæ immergere, tantum non perimere est. Tristitia
enim exedit cor, & omnis plaga tristitia cordis est. Eccl. XXV.

17. Absorbetur autem frater, qui peccavit, tristitiâ suâ, si contemni & abjici se intelligat: si non sit, qui sapienter amantérque eundem consoletur: si meris increpationum tonitruis, pœnarúmque fulminibus super se omne Cælum Regulare inhorreat: neque meminerint accusatores atque judices sui verborum Domini. *Joann. VIII. v. 7. Qui sine peccato est vestrum, primus in illam lapidem mittat.* Hæc mitissimus Dominus ajebat Pharisæis in gratiam fœminæ, manifesto in adulteriò deprehensæ, non obstante expressa lapidationis lege per Moysem lata & quamvis delictum publicum publico scandalo claruerit. Nihilominus tamen Sapientia incarnata peccanti mulieri & culpam, & pœnam, misericordia superexaltante judicium, & Gratia interveniente remisit. O quàm itaque verecundum esse debet hominibus animadvertere in delinquentes, nisi morte, pœnâ tamen, quæ revera sit mors lenta & diuturna, hominémque velut in certissimam mortem impellat! Discretus ergo sit modus disciplinæ, quantumlibet præceptæ. Suadeatur peccanti, ut gratiam delicti apud Prælatum, præprijis verò apud DEUM humiliter quærat, eâmq; à se fiducialiter impetrandam fore, benignè spondeatur. Intelligat fructum dulcem humilis pœnitentiæ, Evangelici Patris cor amantissimum, Gaudium Angelorum in cælo majus super uno peccatore pœnitentiam agente, quàm super nonaginta novem justis. Doceatur, quæ sit salubritas, & necessitas disciplinæ: qua legi satisfit: qua unus corripitur, multi à crimine absterrentur: qua brevi tempore, discretóque modo exolvitur, quod acerbis pœnis à morte, & fortè æternùm foret luendum. Cùm peccatum impunitum esse non possit, eos plerúmque securissimos veniæ videri, qui publicè pœnitent, etsi lege coacti, modò in pœna pacati. Sic lapsus erigitur, sic æger sanatur, sic vitio cæso, arbor nihilominus virebit, sic demum, operâ fraternæ ac discretæ charitatis, spes erit non minima, oviculam perditam quærendi feliciter, feliciùs reperiendi.



SYMBOLUM XXVIII.

Oeconomorum Diligentia.

TEXTUS. Omnia Vasa Monasterij, cunctámque substantiam, ac si Altaris vasa sacrata conspiciat. NEQUE AVARITIÆ STUDEAT, NEQUE PRODIGUS SIT, aut dissipator substantiæ Monasterij: sed omnia mensuratè faciat, & secundum jussionem Abbatis. Humilitatem ante omnia habeat, & cui substantia non est, quæ tribuatur, sermo responsionis porrigatur bonus. *Cap. XXXI. de Cellerar. Monaster.*

28.



EXEGESES.

EXcipit ut fontem, sic rursus Concha refundit,
 Sed cum mensura, dat, retinetque satis.
 Sic pariter faciat, Marthæ qui munera præstat,
 Qui Fratrum curat corpora, resque Domûs.
 Danda neget nulli, sed nulli detque neganda:
 Si sit inops rerum, det bona verba: fat est.



Ille non reputes, aliorum corpora necessariis suis fovere,
 ut illi animo ad cælestia vigeant. Qui benè ministrat,
 bonum sibi gradum acquirit apud eum, qui bonorum

nostrorum non egens, cùm ipse det omnibus affluenter, oculum simplicem multò magis diligit in nobis, quàm opera speciosa. Ne doleas, qui juberis à culina, à Cellario, à Vestiario esse, aut in villa, vel grangia rusticari. Ne malis esse Doctor in Schola, Apostolus in Cathedra: immo ne vel Mariæ, quietè ad pedes Domini sedenti, invideas. Operæ tuæ pretium Obedientia potius, quàm officium tuum. Oeconomum verò ubiubi te voluere? Mensuratè fac omnia. Sic parcus esto, ut nemini avarus videare: ita liberalis, ut nemo te prodigum damnet. Stateram tibi moderetur præceptum Prælati: quod idem & scutum adversum multorum judicia præbebit. Tuum reputes nihil, omnia pauperum Christi. Hinc tibi verecunda sit manus, qua dispensas, & omnium regularum servandarum tanta existimatio, quanta vel Divinæ in Ara Supellectilis. Utrarumque rerum ut idem est Dominus: ita in ambas æquè nulla tibi licentia. Est tamen, quod unicuique dare semper & undique possis, sive divitem penum, sive inopem habeas, si supercilium ponere noveris. *Verbum bonum super datum optimum.* Hoc in ore tuo identidem super mel & favum dulcius reddet vera cordis Humilitas. Placebis humiliter dandò, quod potes, ac debes: sed & nemini bono displicebis amanter deprecandò, quod ei tribuere nec debes, nec potes.



SYMBOLUM XXIX.

Fuga Proprietatis.

TEXTUS. Ne quis præsumat aliquid dare, vel accipere sine jussione Abbatis, NEC ALIQUID HABERE PROPRIUM. - - - Quippe quibus nec corpora sua, nec voluntatem licet habere in propria potestate. *Cap. XXXIII.*

29.



EXEGESES.

Turbine jacta maris jamjam peritura Triremis
 Server, ait: malim, sorbeat æquor opes,
 Qui tua cuncta tibi pro Christo sponte negasti,
 Quidquid in his repetas, naufraga vela facis.
 Ergò tibi proprium meritò nihil esse sinatur:
 Vindicat æternùm talia furta DEUS.

SI quæ charybdis in clauetro metuenda superfit, Proprietas est. Vovisti DEO pauper esse: apud quem quàm certa voti soluti sunt præmia, tam infallibilia violati supplicia. Quoties ab Ecclesiaste audisti *Cap. V. v. 4. Displi-*

cet DEO stulta & infidelis promissio, multoque melius est non votare, quàm post votum promissa non reddere. Vovere unius momenti est: reddere vota totius, quantaquanta est, vitæ. Qui semel est DEI, jam nunquam fit suus. Hinc est, quòd Ecclesia, quæ Ordinem tuum probavit, nullo unquam canone in Monacho proprietatem permiserit: quin contra eandem horrendis semper pœnis addixerit: quas & in singulos annos iteratò repetit, atque intentat. Substantia Monasterij Eleemolina Fundatorum est, & patrimonium pauperum Christi. Horum quicumque è numero sunt, jus acceperunt, ut provida communis in Monasterio Patris, apud quem solum hujus substantiæ dispensatio est, sollicitudine ali debeant. Licitè ergo ea, quæ se contingit ex distributione Prælati, hujus substantiæ portione utuntur, cùmque benedictione, si salva disciplina id faciant, nemine contradicente fruuntur. Privatim verò acquirere sibi quacunque industria, acquisita recipere, recepta tenere, retenta pro libitu suo dispensare, furtiva sunt omnia, nullòque jure tuenda, extra permissionem Prælati expressam, vel omnino rationabiliter præsumtam: cujus tamen etiam facultas in superfluis non patrocinator. Vide itaque Claustri Seculique discrimen. Seculi homines, rerum terrenarum vel possessione divites, vel cupiditate repleti, infando navigant pelago, mille inter mortes miseri jactantur. Claustra non habent nisi placidum fretum. Illi in altum subeuntes, graves suas ad portum triremes ingenti cum periculo subducere student. Monachi cymbula exigua rerum paupere vecti, propè litus securissimè tendunt. Quid itaque agis, qui dedito desiderio tuo Altum præ litore, onerariam navim præ volucris cymbula optas? Vide, quem olim Charonti naulum persolvas. Quò dulciores quis putat aquas furtivas, tantò infeliciùs olim vereor ne sitire cogatur Fontem Aquæ vivæ salientis in vitam æternam. Ne te, quæso, decipiat honestas earum rerum, quas forsitan clàm Prælato tuo curas, atque procuras libera tua dispositione: omnem hujusmodi honestatem, rebus intrinsecam, ab extra de-honestat conditio status tui, per quam proprietatis, liberæque dispositionis æternum es incapax. Sensu itaque sapientum pereat, quidquid est opum, ut salvum sit una cum nauta navigium.



SYMBOLUM XXX.

Murmurationis malum.

TEXTUS. Ante omnia ne MURMURATIONIS MALUM pro qualicunque causa ab aliquo qualicunque verbo vel significatione appareat. *Cap. XXXIV. Si omnes aequaliter debeant necessaria accipere.*

30.



EXEGESES.

Flumen ubi currens offendit ad obvia saxa,
 Quæ findunt undas, diminuuntque sibi,
 Murmurat, & strepero sonitu velut increpat hostes.
 Discolus in Claustro sic quoque frater agit.
 Si non cuncta licent, vel si non optima dentur,
 Murmurat, & spernit, pro Patre stare DEUM.

Magnæ molis opus, integræ Congregationi providere tanquam Communis Pater, fartam tectam conservare disciplinam, animas æquè ac corpora universorum curare. Magnæ, inquam, molis opus in humeris unius hominis! Quem nisi assumeret, nisi regeret ipse DEUS, quàm nimis

mis infirmus esset? Sed vices DEI gerit: lumine DEI illustratur: jussa DEI accipit, & exequitur. Unde, nisi oblitus DEI, quod nunquam præsumas, contra DEUM jubeat, quidquid disponit, ac mandat, tanquam à DEO præsente id fieret, certè accipere debes. Et murmurare contra Patrem tuum levissima de causa audes? parvipendis? contemnis? Nónne contra DEUM est murmur tuum, qui in Patre tuo Ipse tibi est Pater? Murmurare res gravis, res noxia, res pestilens! Cogita, obsecro, electum olim DEI populum, hodie abjectum. Versa reversa, volve revolve, lege & relege veteris testamenti paginas benè multas, & vide, si non murmura perpetua necârunt omnem populum de Ægypto egressum in deserto, ne uno quidem è tot tantisque millibus, præter Josue & Caleb, in Terram Promissionis admisso. Nónne DEUS illico in Mariam Sororem Moyfis (quantæ existimationis apud omnem Israel fœminam!) mox, ut contra Fratrem murmuraverat, infami leprâ vindicavit? Putas, quodd aded quondam displicuit magno DEO, eidem hodie non æquè fore invisum? Cave, si patienter duci regique nolis à Patre, quem DEUS tibi constituit, ne hic, ulturus & Vicarium suum, & spretam à te Gloriam suam, te pariter abjiciat, ut non sis filius suus, atque æternùm à Patria illa beata, quò tendimus omnes, excludat.



SYMBOLUM XXXI.

Cura Infirmorum.

TEXTUS. Infirmorum cura antè omnia, & super omnia adhibenda est, ut sicut REVERA CHRISTO EIS SERVIATUR, quia Ipse dicturus est: *Infirmus fui, & visitastis me.* Et: *Quod uni fecistis de his minimis meis, mihi fecistis.* Sed & ipsi Infirmi considerent, in honorem DEI sibi serviri, & non superfluitate sua contristent Fratres servientes sibi. *Cap. XXXVI. de Infirm. Fratrib.*

31.



EXEGESES.

QUæ jamjam est ruitura Domus, per fulcra juvatur,
Ulteriùs Domino ut serviat illa suo.

Infirmo Fratri debetur maxima cura,

Cùm Templum vivum, cùm sit Imago DEI.
Fratribus, ut Christo, patiens patientibus adsta:

Præmia compatiens cum patiente feres.



Verba dulcedinis infinitæ, procedentia ex ore Filij DEI
Mathe. XXV. v. 34. *Tunc dicet Rex his, qui à dex-*
tris ejus erunt: Venite benedicti Patris mei, possidete
para-

Q

paratum vobis Regnum à constitutione Mundi. Esurivi enim, & dedistis mihi manducare: sitivi, & dedistis mihi bibere: hospes eram, & collegistis me: nudus, & cooperuistis me: INFIRMUS, ET VISITASTIS ME: in carcere eram, & venistis ad me. - - - Amen dico vobis, quamdiu fecistis uni ex his Fratribus meis minimis, mihi fecistis. Soli facem accenderet, mari aquam affunderet, in ventum Spargeret verba, quisquis hunc melleum Domini nostri Sermonem, penetrabiliorem omni gladio anticipiti, urgere quacunque oratione composita vellet apud eos, qui Spiritu DEI aguntur, & idè Filij DEI vocantur, & sunt. Revocâsse in memoriam sufficit infinitè dignum tuæ miserationis objectum, ineffabile tuæ misericordiæ præmium. Erubescat, si quis est, qui ad hæc pigeat, & in tempore agat, nè fortè ad se pertineat, quod apud Evangelistam statim post præmissa, utique cum horrore pij cujuslibet animi, legere licet. Diligens interim Infirmorum cura, pro Christi amore suscepta, neque animam, neque corpus ægri Confratris negligere debet. Non animam: ut Virtus ejus per jugem Compunctionem, Resignationem, patientiam, sanctas aspirationes, frequentata Divina Mysteria in infirmitate perficiatur. Colligenda est illa in DEUM: absit, ut fabulis, vanisque visitantium rumoribus dispergatur. Non corpus: quia etiam in Religiosissimo quoque omnia naturæ pondera trahunt ad vitæ, pristinaque incolumitatis amorem. Infito ergò huic & connaturali affectui, quomodolibet liceat, obsecundandum: quo pacto Anima quoque infirmi plenam tibi sui copiam faciet. Nulli solatio infirmi corporis parce, ut in Anima regnes. Beati oculi tui inter hæc forsitan insomnes! beatæ nares fœtore forsitan offensæ! Beatus animus tuus, quem infirmi, doloribus inebriati, suisque verè non compotis nulla impatientia, asperitas, indignatio frangunt! CHRISTO, cujus Templo vivo ruinam meditantem te fulcrum supponis, debitorem habes & vadem
Gloriæ tuæ immortalis.



SYMBOLUM XXXII.

Lectio Mensalis.

TEXTUS. Mensis Fratrum edentium LECTIO deesse non debet, - - - summumque Silentium fiat ad Mensam, ut nullius mussitatio, vel Vox, nisi solius legentis, ibi audiatur. *Cap. XXXVIII. de Hebdomadar. Lector.*

32.



EXEGESES.

A Rbor sit quamvis Terra prognata parente,
 Poma tamen vegetæ dulcia debet Aquæ.
 In nobis Corpus quantumvis nutriat esca,
 Procreat ast fructus Lectio sacra bonos.
 Arbor es, & fructu pensabere iudice Christo:
 Ore cibos, animo mandere lecta stude.

Vivere tibi quid profit, nisi sobriè, piè, ac justè vivere detur? Vita tua certissima mortis victima: benè autem si vixeris, peculium promis, quo cælum tibi vendibile prostat. Verbô, Arbor es, in qua Pater cælestis non spe-

speciem, non ætatem, non luxum foliorum exquirat, sed fructus reposcit. Hos bonos nisi feceris, excidendam, & in ignem mittendam te comminatur. Quàm verè itaque *non est Regnum DEI esca & potus: sed justitia, & pax, & gaudium in Spiritu Sancto?* Rom. XIV. v. 17. *Esca ventri. & venter escis: DEUS autem & hunc, & has destruet.* I. Cor. VI. 13. Sollicitè pensa, quia Doctore Filio DEI Math. IV. v. 5. *Non in solo pane vivit homo, sed in omni verbo, quod procedit de Ore DEI*, nimirum tanquam Fons Aquæ vivæ salientis in vitam æternam. Felix Arbor, citrà dubium mirum in modum fecunda fructibus Spiritus Sancti, quæ hoc fonte Divino irrigari inexplebiliter cupit, & satagit. Corpus refice, uti diligentissimè facis: cave autem, nè omnem in mensa operam tuam impendas in solam escam vermium. Refice multò magis & spiritum, cui primæ debentur: ipse enim est, qui fructificat. Sacra ad mensam Lectioni aure cordis magis, quàm corporis ausculta, ut frugi sis homo. Ni feceris, quærenti aliquando ex te fructus, & non inveniendi Filio hominis, sedenti in throno DEI, frustra famem obtendes in terra, sive penuriam Verbi DEI. Neque enim eos inter parvulos es, qui petierunt panem, & non erat, qui frangeret eis. Patrem domi tuæ habes, qui ex lege Regulæ utrumque panem, cordis ac corporis, quotidie diligentissima providentiâ tibi dispensat. Si sterilescas, quid causæ erit, nisi quòd ipse cum Religione comedere nolis? Quot verba Lectionis Sacrae, tot stillæ pluviae cælestis. Quantas harum vago animo, indisciplinato oculo, vel garrula lingua neglexeris, tot aurea poma tui profectus ipse tibi suffuraris, jacturâ, quam amarè deflebis, cùm reparare haud amplius poteris.



SYMBOLUM XXXIII.

Abstinentiæ Utilitas.

TEXTUS. Unusquisque proprium habet Donum ex DEO, alius sic, alius verò sic. - - - Quibus autem donat DEUS tolerantiam ABSTINENTIÆ, propriam se habituros mercedem sciant.
Cap. XL. de Mensura potûs.

33.



EXEGESES.

Fistula dulce melos, & suavia cantica promit,
Si subeat vacuum spiritus ore finum.
Crebra tibi vacuent jejunia sobria corpus,
Adveniétque frequens Spiritus ecce! DEI.
Hoc animante dabis cælestes pectóre voces,
Et toti clanges Musica grata Polo.

Non facilè ad Virtutem expeditior via præ sobria victûs
ratione, & perfecta Animi temperantia. Reges illa
facit, quos Gula cum ingenti, si patimur, opprobrio
nostro ad compedes damnat. Sobria mens indomitæ animi mo-
tibus

tibus Sceptro suo, uti virga ferrea dominatur: Regit eos, coërcet, & comprimit. Contrà quem crapula & ebrietas gravant, nulli concupiscentiæ par est edomandæ: neque Spiritus Divini, neque Sapientiæ, neque vigilantia capax est, immodè & suæ rationis non compos. Quantum adipe caro farcitur, tantum proficit ad macellum, quo jugulatur. Æstuat enim venter repletus, quasi olla succensa: vel si non æstuat, stertit. Utrumlibet agat, à malo est. Stertendô quippe nil boni, æstuandô nil benè fit. Misera anima in corpore, quod esurire non didicit. Ejulat illa: *Quis me liberabit de corpore mortis hujus?* Vivens enim jam mortua est. Nam opera ejus vel vitâ indigna, vel planè digna sunt morte. Domestice DEI! ah! ne patiari, membra tua semper arma iniquitatis servire ad iniquitatem. Quin potiùs sancta sobrietate fac ea servire justitiæ, veritus, ne subitò dicatur Judici justo de te: *Ecce homo, & opera ejus!* Vacuum natura quidem abhorret, sed Gratia quærit: cujus oleum fluet, usquequò vasa vacua fuerint. His deficientibus stabit. *Dilata os tuum*, Spiritus Domini ait, *& implebo illud.* Nónne vacuum quærit, quoniam plenum impleri non potest? Attende, quæso, Spiritui, qui spirat, ubi vult. Neglectum à te, uti nescis, unde venerit, ita & quò vadat, æternùm ignorabis.



SYMBOLUM XXXIV.

Silentium maximè nocturnum.

TEXTUS. Omni tempore SILENTIO debent studere Monachi, maximè tamen NOCTURNIS HORIS. *Cap. XLII. Ut post Completorium nemo loquatur.*

34.



EXEGESES.

Nostra omnis gemino versatur cardine vita,
Atque labore Dies, Nôxque quiete fluit.
Ecce ! DEI Sapientis opus. Pervertere quisquis
Hoc ausit, fatuus desipit, errat, hebet.
Sat tibi dant Scnsus sub Sole micante laboris,
Sat belli, & pugnae : Nocte vacato tibi.

ANnè non sufficit diei malitia sua? quid noctem inimicam homini in te spontè proritas? DEI beneficio factum est, ut Sole cadente dispereant objecta, quæ sensus tuos tot pessimis motibus in tui perniciem concitant. Et tu hostes inermes ad lampadem nocturnam ultrò in te spontè obarmas? Ne noctem vertas in diem. Quin potiùs, si sapias,

pias, commissa sub sole nocte sepelias. Lava per singulas noctes lectum tuum, & stratum tuum compuncti pro erratis animi acerbis lachrymis riga. Quid somnus, quem capies tandem, nisi plurima mortis imago? Et mortis antè somnum immemor eris? Mortis, inquam, qua forsitan hac nocte indormies, Orientem non alium, quàm terribilem Solem Justitiæ, Judicem DEUM visurus? Apage nugas, ubi vitæ & salutis periculum facis. Neminem nôsti, qui nocte decubuit, & nunquam surrexit? Quæ misera fors alium involvit, & tibi esse in januis potest. Execrare fabulas vespertilionum tenebricantium: tinniant potius Aures tuæ ad has revera formidabiles præmonentis te Veritatis commonitiones. *Veniet nox, in qua nemo potest operari. Media nocte clamor factus est: ecce sponsus venit, exite obviam ei: & quæ paratæ erant, intraverunt cum eo ad nuptias, & clausa est janua. Stulte! hac nocte repetent animam tuam à te. Veniam ad te, tanquam fur in nocte.* Hæc meditare tu nocte cum corde tuo, hæc tecum ipso confabulare: & orietur in eo Lucifer ô quàm beatus. Noctem insigni DEI benignitate quieti tam corporis quàm animi tui factam uni tibi impende: tibi vaca, & modis omnibus cura, ne fuscitet te, ne unquam evigilare faciat horis maximè incompetentibus quicumque alius dilectorum tuorum. Solus cum solo DEO per amica silentia noctis tracta negotium beatæ æternitatis.



SYMBOLUM XXXV.

Operi DEI nihil præponendum.

TEXTUS. Ad horam Divini officij, mox ut auditum fuerit Signum, relictis omnibus, quælibet fuerint in manibus, summa cum festinatione curratur, cum gravitate tamen, ne Scurrilitas inveniat fomitem. Ergo NIHIL OPERI DEI PRÆPONATUR. *Cap. XLIII. de his, qui ad Opus DEI tardè occurrunt.*

35.



EXEGESES.

Omnibus Alpha notis, quas prima elementa vocamus,
Undeque formamus verba diserta, præit.
Alpha & Omega DEUS, dânsque omnibus omnia, nōnne
Supplice præ cunctis mente colendus erit?
Nil igitur præpone Sacris: linque omnia, curre,
Hora ubi servitium poscit, Opûsque DEI.



Ecce! Magister adest, & vocat te. O pietas immensi
Domini in servum vilissimum! Tam rara, quàm
summa in Aulis Gratia, pauperem civem vel semel,
S vel

vel ad aliquot solummodò momenta posse alloquio Principis frui, eventu interim-maximè dubio, audiat supplicem, annè repellat? Tibi Rex Regum, & Dominus Dominantium, sub quo curvantur, qui portant orbem, cui millia millium in excelsis ministrant, & decies centena millia assistunt, tibi, inquam, Rex iste Seculorum immortalis, Dominus Virtutum, & Rex Gloriæ, vultum immensa pietate plenum semper hilaris diu, noctúque amantissimè porrigit: aures præstat precibus tuis semper intentas: manus exhibet thesauris infinitis oppletas, & veluti rore matutino dulcedine omni stillantes. Tardantem te suavissimè vocat: venientem benignissimè excipit: redeuntem bonis & donis abundantissimè cumulat. Et tu ad hunc tantum, talémque Gratiae Thronum, ad expansum Clementiæ Sinum accedere, ne dicam accurrere, tardas, lentescis, pigrescis? Servus Dominum, filius Patrem, cliens Patronum, Sacerdos Altissimi DEUM tuum fastidis? Peccator veniam, Æger salutem, inops divitias, tribulatus levamen, tentatus adjutorium, exagitatus refugium negligis? Si talis es, & non modò tuas, verùm omnis pariter Provinciæ necessitates, pro quibus ut apud DEUM interpelles, constitutus es, aleris, & largiter sustentaris, ad eum referre statim diei noctisque temporibus despicias, quod nolit omnipotens, nescio sanè, tibi quid dicam. Hoc duntaxat in Aures. Alpha tandem cum puerulis disce, tecúmque pensiculatiùs, quæso, meditare Alpha & Omega DEUM. Meditare, inquam: iterum dico, meditare. Stare ad solem videre est: contemplari DEUM eundem amare est. Amandò quæres, quærendo invenies, inveniundo delectaberis in DEO tuo, delectando nunquam fatiaberis.



SYMBOLUM XXXVI.

Otiositas fugienda.

TEXTUS. Otiositas inimica est animæ. Et ideo certis temporibus occupari debent Fratres in Labore manuum, certis dierum horis in Lectione Divina. *Cap. XLVIII. De opere Man. quotid.*

36.



EXEGESES.


UT libet, arripitur, recubans quæ deside testa
Ecce! dies totos Cochlea pigra terit.

Sic otio quisquis torpescit, ad omnia promptus
Crimina, fit cupidae commoda præda stygi.

Unde labore tuis alterno prospice rebus:
Nunc cane, nunc ora, nunc lege, scribe, stude.

ACTI à DEO, atque missi in Mundum, bona multa de manu ejus singuli accepimus: quæ tamen sua nihilominus, nostra verò minimè existunt. *Negotiamini*, ait, *dum venio*. Imperium hoc, *Negotiamini*, vaser Serpens ille stygius fatali sybilo dolosè nobis circumcidit, ut veluti Ec-

cho mendax insonet in auribus nostris: *Otiimini*. Cicero hoc pacto pro domo sua versipellis ille, prædis infinitis, ex homine detractis, ditescit. Dari pecuniam suam ad mensam numulariorum voluit Dominus, ut cum usuris eam à nobis olim reciperet. Is porrò, qui audit serpentem, talenta sua Sudario, quo ad sudorem abstergendum, è laboribus profectum, uti debuerat, piger & otiosus involvit. Atque inde non modò lucra nulla, sed etiam detrimenta plurima reportat. Otiari siquidem regredi, non progredi est: adepta jam merita pessumdat, & adipiscenda sufflaminat. *Non plus ultrà* pigri est tessera: Domini verò, *Plus ultrà*. Dixit namque: *Qui perseveraverit usque in finem, hic salvus erit*. Sed & dilectus Domini Discipulus desidem quemlibet admodum ferit, dum scripsit: *Qui manet in Charitate, in DEO manet, & DEUS in eo*. Charitatem si piger conservaret, magna operaretur. Ut fumus ignem, sic Charitatem opera produnt. In quo ergò Charitas non manet, quæ jungit amantes, quomodo is manet in DEO, & DEUS in eo? quomodo olim DEO adhærebit in patria, apud quem otiositas inimica Animæ vinculum Charitatis identidem abrumpit in via? Neque DEO piger, neque sibi, neque fratribus utilis, soli diabolo ab officio est: cui vel stertenti ultrò obsecundat. Tam enim jam antiquum, quàm verum est: Oti-um pulvinar diaboli. Sapientis emblemata erat: *Vade ad formicam, ô piger!* Sed refugit forsitan, qui talis est, vel umbram videre laboris. Cochleam ergò intueatur secum stertentem in testa, connaturalem planè desidiæ inertis imaginem. Si tamen non omnis in eo ratio dudum pigritando putruerit, obsecro, pensitet, an vel ullum insectum facilius captu, quàm Cochlea? Extende manum, & habes. Æquè porrò promptum diabolo semet intelligat, & expavescat.



SYMBOLUM XXXVII.

Reverentia Templi.

TEXTUS. ORATORIUM hoc sit, quod dicitur, nec ibi quidquam aliud geratur, aut condatur. Expleto opere DEI omnes cum summo Silentio exeant, & AGATUR REVERENTIA DEO. *Cap. LII. de Orator. Monaster.*

37.



EXEGESES.

STermuntur crates patefacta sub Atria Templi,
Semita lapsuro non benè tuta pedi.
 Sic pecus arcetur, geritur Reverentia Sancto:
Summus ubi DEUS est, sit quoque summus honor.
 Os preme: nam Domus hac devota silentia poscit.
Oranti structa est Aula sacrata DEI.

Quam immensa est dignatio Templum DEI cum hominibus, ut omni sub Sole non sit alia natio tam grandis, quæ verum habeat DEUM appropinquantem sibi: tam non ferenda est omni homini bono insolentia,

lencia, in Domo DEI homines, quasi porcos, grunnire. Abraham colloquio DEI, & promisso Filij, atque innumerabilis populi ex eo nascituri recreatus, non potuit non ad tanti gaudii nuncium modestè lætandô subridere. Sed audi Scripturam Gen. XVII. v. 17. *Cecidit Abraham in faciem suam, & risit.* Humani aliquid se passurum præsentens in conspectu DEI vivi, verecundiâ tantâ præ reverentia erubuit, ut faciem risuram terræ affigeret. Seraphim stantes ante Thronum DEI, duabus alis velabant faciem, quia splendorem ferre non poterant: cæteris verò duabus velabant pedes, quodd iisdem dignè satis inflexis revereri DEUM nequirent. Seraphim alter linguam Isaïæ emundaturus, carbonem de Altari forcipe abstulit. Ecce cur non manu? reverentia nempe vetuit Altare contingere. Ingeniosius forsitan quàm ponderosius hæc dicta existimes. Ediffere igitur, quando legisti, Filium DEI conversatum cum hominibus, crimina ulla, quæ quidem exprobraverat sæpe, per seipsum vindicasse? Solo in Templo, cum vendentes & ementes videret, zelus Domus DEI ità eum comêdit, ut numularios, factò flagello de funibus, ejiceret, ac mensas eorum everteret. Neque hoc Domini factum, terribile tam iis, qui viderant, quàm nobis, qui legimus, alicujus apud te ponderis erit? Fortè hanc ejus iram in odium & pœnam scœnerationis atque lucrorum iniquorum refundes? Vanus es, & nullus in hoc totus. Hujusmodi farinæ homines, in quibus & Matheus, & Zacheus erant, alibi à se visos tantum abest eum expulisse à se, ut potius ad se quàm benignissimè vocaret. Vehementis, sanctissimæ tamen iræ suæ causam luculentè expressit, fulminis in modum intonans. *Scriptum est: Domus mea domus Orationis vocabitur: vos autem fecistis eam speluncam latronum.* Solve hoc argumentum, qui Templo usquequaque risibus & fabulis irreverens es, neque multum à latronibus distas. Quot enim non animas meliores te scandalizas? Sed perge, si è re tua videatur, in loco Gratix thesaurizare tibi iram pro die iræ, & vide, quo demum in loco veniam sis promeriturus.



SYMBOLUM XXXVIII.

Hospitalitatis leges.

TEXTUS. Omnes supervenientes **HOSPITES** tanquam **CHRISTUS** suscipiantur, quia ipse dicturus est: *Hospes fui, & collegistis me.* Et omnibus congruus honor exhibeatur, maximè Domesticis fidei, & Peregrinis. - - - Pauperum & peregrinorum maximè susceptio omni cura sollicitè exhibeatur: quia **IN IPSIS MAGIS CHRISTUS SUSCIPITUR.** Nam divitum terror ipse sibi exigit honorem. *Cap. LIII. de Hospitalibus suscipiendis.*

38.



EXEGESES.

Ultrò se pandunt Mala Punica, viscera granis
 Dulcia purpureis sponte patere volunt.
 Haud secus & Christus quæ pectora fauciat, omni
 Se pandunt misero, semper amore rubent.
 Exspoliant sese ipsa bonis, ut pauper alatur:
 Perdita non perdunt; dat nova dona **DEUS.**

Beata Religiosæ Hospitalitatis tessera, maximè illa, quam Pauperes Christi, pio suggerente Charitatis affectu, Domesticis fidei, Peregrinis, & egentibus largiuntur,

ut Christum in eis suscipiant. Beata secula, quibus Claustra adhuc Regias extrà vias in Montibus, Vallibus, atque Sylvis velut inuis condita, carnem & sanguinem non intromiserunt, sua in solitudine quieta. Si quis non egentium ad Monasteria se contulit, ædificationis id ergò, & compunctionis capiendæ, vel verò amplioris devotionis in summis festis exercendæ causâ & occasione fiebat cum summa modestia. Opipari instar epuli eis fuerant fabæ & pisa, atque vilia quæcunque Monachorum pulmenta. Hæc utrinque parsimonia Penum Monasterij, licet non uberrimam, parem tamen fecit reliquæ peregrinorum & egentium turbæ, quæ nunquam defuerat, peramanter refocilandæ. Sed fuere illa, non sunt ista hæc Secula: qualia insuper veluti frustrà jam speres. Neque tamen propterea Charitas suo deesse officio debet. Si semper de pauperibus cum affectu curetur, semper erit, quod cum Charitate tribuatur. Fœneratio ista ô quàm superat lucra quorumlibet numulariorum! Amore in pauperes si certes cum Christo, vincere sanè non dabitur tibi: vinci tamen præ omni victoria proderit. Amore sui expensa recipit equidem Christus: sed non, nisi tuos in usus, reponit. Eleemosinis tuis parabitur corona, qua quondam æternum fulgebis. *Ex substantia tua fac Eleemosinam, & noli avertere faciem tuam ab ullo paupere: ita enim fiet, ut nec à te avertatur facies Domini. Quomodo potueris, ita esto misericors. . . . Præmium enim bonum tibi thesaurizas in die necessitatis. Quoniam Eleemosina ab omni peccato, & morte liberat, & non patietur animam ire in tenebras. Fiducia magna erit coram Summo DEO Eleemosina omnibus facientibus eam. Ita vivum, DEOque olim acceptissimum, totisque visceribus suis expansum Malogranatum, vehementissimus Pauperum Orator Tobias senex ad Filium, perque eum DEUS ad omnes Tob. IV. v. 7. seqq. Quid ultrà desideras, ut & tu cum Punicis malis dulcia pauperibus & peregrinis viscera ultrò expandas? Superest solum, ut, sive in propria refectione tua demas tibi de cibo ac potu, sive Hospitem suscipias, in eo, & paupere quolibet, reficias Christum, & hunc in Eleemosinis tuis toto animo cogites.*



SYMBOLUM XXXIX.

Orandum cum Hospite.

TEXTUS. Ut nunciatus fuerit Hospes, occurratur ei à Priore, vel Fratribus cum omni officio Charitatis, & PRIMITUS ORENT PARITER, & sic sibi socientur in pace. Quod pacis osculum non prius offeratur, nisi ORATIONE PRÆMISSA, propter illusiones diabolicas. - - - Suscepti autem Hospites ducantur AD ORATIONEM, & postea sedeant cum eis Prior, aut cui iusserit ipse. Legatur coram eo LEX DIVINA, ut ædificetur: & post hæc omnis ei exhibeatur humanitas. *Eod. Cap. LIII.*

39.



EXEGESES.

MOs Aquilæ manè est, non pabula quærere primùm,
Sed recreare prius lumina Sole novo.

Hospiti amore pio quoties tua prandia ponis,
Tecum orans, Gnomas audiat ille sacras.

Sic jungente DEO, frustrato dæmonis astu
Sanctus erit, qui vos consociabit, Amor.

PHilosophia sancta, principium Charitatis petere à DEO,
qui Caritas est. Casta Nympha pura DEI Dilectio:
fucum illa non patitur, neque larvam Amoris terreni.

Nisi in Hospite Christum susceperis, in eo Christum non diligis. Quod proinde ei non dederis, ille tibi neque debebit, neque reddet. Cautè observa, quid in Hospite ames, & colas: quid illi largiaris, & tribuas. Non tuum, sed Hospitis attende solatium, ac commodum. Nunciato hospite non gaude, quòd recreare te possis, sed ei, qui Christum tibi redhibet, obsequi. Secus si egeris, tam propè abes ab animæ tuæ periculo, quàm longè à merito & præmio. Illicò cum Seculi homine agens, finè auspice Christo, Seculi pice & amore inquinaberis. Cave huiusmodi *illusiones diabolicas*, propter quas sanctè omninò statuit Pater tuus Sanctus, ut Pacis osculum non priùs offeras Hospiti, nisi Oratione præmissa: qua videlicet breviter, sed ex animo, intentionem obsequij tui unicè in Christum defigas. Nisi iussus à Priore, hoc servitij genus vide ne cupias, vel capiere: absque enim Obedientiæ merito planè verearis, nè Christum se invito & quæras, & minimè reperiās. Iussus cave, nè refugias, vel punièrè, quòd obedire detrectes. Ad Christum importunus non irrue: nulla enim ejusdem gratiâ id feceris. Missus fastidiosè nè refuge, oblatam nè gratiam respuas. Cùm accesseris, tu saltem ora, si hospitem commodè ad Orationem ducere nequeas: nè inducaris in tentationem, & fallaris qualicunque negotio perambulante in tenebris. Pransurus cum illo, Lectione sacra, quidni verò multò magis colloquio sacro, ut feret occasio, scitè eundem ædificare omninò satage: ut intelligat, se in Loco sacro hospitari. Utiliùs animam ejus pascas, quàm corpus. Si Aquila, quod ferunt naturalium rerum scriptores, sole potiùs, quàm cibo delectata, totis horis eidem inconnivis oculis intendat: quantò æquiùs homo, qui DEO se totum sacravit, singula inchoet à DEO, pro illo agat, cum eo finiat? Et tu itaque omne obsequium tuum, quantacunque potes, ratione dirige in Christum, utque dirigat & hospes, cui obsequeris, maximo studio cura. Hoc demum pacto *DEUS pacis & dilectionis* indubiè erit vobiscum.



SYMBOLUM XL.

Verus Finis profitendæ Religionis.

TEXTUS. Noviter quis veniens ad Conversionem, non ei facilis tribuatur ingressus: sed sicut Apostolus ait, *Probate spiritus, si ex DEO sint.* Et Senior ei talis deputetur, qui aptus sit ad lucrandas animas: qui super eum curiosè omnino intendat, **SI VERE QUÆRAT DEUM:** si sollicitus est ad Opus DEI: ad Obedientiam: ad Opprobria. *Cap. LVIII. de Disciplina suscipiendor. Fratrum.*

40.



EXEGESES.

Ferre decet punctum, centrúmque ferire sagittâ,
Non orbem, jaculo vincere si quis amet.
 Orbis ad instar habet non infima commoda Claustum:
Sed Centrum DEUS est, quò tela cuncta volant.
Cætera si tangas, erras: neque Lucra tenebis
Votis digna tuis, nec tibi tuta salus.

Ignorare finem, eundem negligere, excidere illo, maxime apud Monachum, ilias malorum, & certa perditio.

Media ordine perverso prosequi tanquam finem fatuitas noxia. Honor, qui hodie Religioni habetur, Victus finè cura, Officiorum in Claustro, & extra illud diversitas, contubernium & charitas Fratrum, Studiorum opportunitas, orbem explicant, veluti metam, quæ palàm suspensa est, illicitis multis compositum ad rapiendos in Claustra juvenes. O nimium infelix, qui ad ista collimat! Centrum in hac meta solus DEUS. Ecce! fixam sanctissimi Legislatoris sententiam: Curiosè omninò noviter venienti ad Conversionem intendendum esse, *si verè DEUM quærat*, non se: & idèd *solicitus sit ad opus DEI*, non ad commoda sua: *ad Obedientiam*, non voluntatem suam, & desideria Cordis sui: *ad opprobria*, non honores, & solatia. Ità qui non tendit contendens ad claustrum, uti Centrum non ferit, ità præmium nunquam referet etiam in loco sancto animæ suæ salutem. Discite Tirones, discite justitiam moniti, & non temnere DEUM: quem fallere, uti forsitan homines, non potestis. Quod inchoatis veniendo ad claustrum, morte suo tempore ibidem consummabitis: sin porrò malè cæperitis, vix demum benè finietis. Quam Vitâ Monachi sollicitè actâ promereri palmam neglexeritis, sub mortem figurâ Monachi non consequemini. Vivere itaque soli DEO in claustro eligite, neque unquam hoc propositum deserite. Idem vobis esse debet Centrum tam hujus temporis, quàm nunquam finiendæ æternitatis. Nequaquam enim hîc à DEO cultu devoto sejuncti, eum ibidem laudare cùm omnibus Sanctis finè fine poteritis.



SYMBOLUM XLI.

Salva sub Lege Regulæ Libertas.

TEXTUS. Legatur ei (*Novitio*) hæc Regula per ordinem, ut sciat, ad quid ingreditur, & dicatur ei: Ecce Lex, sub qua militare vis. Si potes observare, ingredi: si verò non potes, liber discede. - - Et si habita secum deliberatione promiserit, se omnia velle custodire, & cuncta sibi imperata servare, tunc suscipiatur in congregatione, sciens, SE SUB LEGE REGULÆ constitutum - - quam SUB TAM MOROSA DELIBERATIONE licuit recusare, aut suscipere. *Eod. Cap. LVIII.*

41.



EXEGESES.

Solsequium Solem sequiturque, & respicit ultrò:
 Quod quia spontè facit, perpetuòque facit.
 Sic quotquot Claustri modò Relligione tenentur,
 Libera turba priùs, quod voluêre, tenent.
 Sic semper teneant, teneant constanter, & Arbor
 Cui sacra est, Fructus sint paritèrque sacri.

Mutuis pactis, DEI nimirum & hominis, consistit Religio: quæ cùm DEUS summè fidelis nunquam violet, stringitur sanè & homo, ut ea pariter integra servet.

vet. Ni fecerit, DEUM quidem fide liberabit: hujus verò benedictio, quam noluit, à se plurimùm elongabitur. Quæ priùs calcaria à te spontè expetita sunt, defactò Lex tibi ad-movet: transit voluntas in necessitatem, sed ô quàm beatam, quia cogit in melius. Ad te pariter attinet, quod eleganter de Virginibus DEO sacris olim Tertulianus: *Tantò magis liberæ, quantò DEI solius ancillæ.* Paradoxum equidem in Mundo videtur, lege simul, ac liberè agere, spontè ac præcepto obedire. Sed beati Viri Voluntas liberrimè est in Lege Domini. Justo Lex non est posita, sub qua, veluti sub jugo invitè laboret: sed in quam duntaxat, velut in exemplum sancti sui propositi, ultrò libentérque intueatur. Ergò Genus electum Religiosi: quibus quod semel sponte atque liberrimè placuit, nunquam ampliùs displicet. Populus Acquisitionis, qui non è servis & mancipiis, sed filiis peculiaribus coaluit, quibus DEUS specialiter esse dignatur amantissimus Pater.

Eja florete Solsequia beata, & Solem æternum, cujus nullus unquam occasus, jucundè sequamini in perpetuas æternitates.



SYMBOLUM XLII.

Sacerdotis Perfectio.

TEXTUS. Ordinatus caveat elationem, aut superbiam, nec quicquam præsumat, nisi quod ei ab Abbate præcipitur, sciens, se multò magis disciplinæ regulari subditum. Nec occasione Sacerdotij obliviscatur Regulæ Obedientiam, sed **MAGIS AC MAGIS IN DOMINO PROFICIAT.** *Cap. LXII. de Sacerdotib. Monast.*

42.



EXEGESES.

CLara lucerna Domus nōne est benè structa Fenestra,
Quòdque capit, Solis dividit illa jubar?
Omni Mysta die Divini lumine Solis
Fulgidus ante Aram, fulgeat ipse domi.
Hunc omnes habeant Speculum, & Virtutis ideam,
Utque gradu propior, sic sit amore DEO.

Magne Sacerdos Altissimi, monstra te esse, quod es.
 Moyfes ex colloquio cum DEO resplenduit, ut faciem ejus populus ferre non posset. Fulgorem tuum fac

fac esse Virtutem non vulgarem. Non modò te Sancta Sanctorum quotidie ingredi, sed & Sanctum Sanctorum è cælo revocare in terram, videre oculis, gestare manibus, nobisque ostendere, immò & intra teipsum sumendo recipere videmus. Prò quantum te purum exigit DEUS! Talem porrò te omnes intueri unicè cupimus. Mediator es noster ad DEUM: nostram Victimam immolas: nostra per te Propitiatio quæritur: Legatione pro nobis fungeris apud DEUM: omnem nostram in te fiduciam ponimus. O absit æternùm, ut iram potius nobis, quàm gratiam, ipsique tibi his tremendis ministeriis reportes! Quod si non facis, quomodo potes non sanctissimè conversari, & omnem justitiam primus implere? Per te, tanquam Fenestram decoram, niteat Domus nostra, sicque radios Divini Solis in te collige, ut & nos in lumine tuo ambulemus.



SYMBOLUM XLIII.

Vitæ meritum, non Ætas discernenda.

TEXTUS. In omnibus omninò locis ÆTAS NON DISCERNATUR IN ORDINE, nec præjudicet: quia Samuel & Daniel pueri Presbyteros judicaverunt. *Cap. LXIII. de Ordine Congregat.* Vitæ merito & Sapientiæ doctrina eligatur, qui ordinandus est, ETIAMSI ULTIMUS FUERIT IN ORDINE Congregationis. *Cap. LXIV. de Ordinando Abbate.*

43.



EXEGESES.

Non cupis ætatem, fructum sed in Arbore quæris:
Sæpe tibi juvenis præ sene chara magis.

Hinc etiam patere, ut præsit tibi Junior, ornat
Quem vitæ meritum, Gratia quémque docet.

Sæpe DEUS multa Juvenem pietate nitere
Quippe facit, sanctum quem cupit ille Senem.

Nulla est Virtus nostra, nisi ex DEO. Sed fontem Gratia DEI nemo sibi potentiùs & infeliciùs obstruit, quàm qui alienæ virtuti vel invidet, vel eam contemnit.

temnit. Idem DEUS dives in omnes, & Dominus omnium, unicuique, quantum, & ubi, & quando vult, æquissimè tribuit. Domino interim Vineæ similis, exit primo manè, conducere operarios in vineam suam: & alios quidem mox in Aurora, alios hora tertia, alios hora sexta, alios hora nona, alios demum hora undecima primùm, pacto denario, suam in vineam mittit. Quis murmuret adversus hunc Dominum bonum? Solet is plerùmque inchoare in juvenibus, immò & in pueris ea dona, quibus eos in gravem usque senectutem fructum in Domo DEI eximium facere ab æterno decrevit. Hinc illud Prophetæ: *Bonum est homini, cùm portaverit jugum ab adolescentia sua.* Item Sapiientis: *Adolescens juxta viam suam, etiam cùm senuerit, non recedet ab ea.* Fructus itaque bonos & uberes dum vides, sive recens, sive annosa sit Arbor, lætare. Benedic Dominum, neque fastidias, quamprimum intelligis, velle eundem, ut his te frugibus pascas. Non ignoras, esse DEUM, qui esurientes, quibus nullus desipit cibus, replere solet bonis, fastidiosos verò divites dimittit inanes.



SYMBOLUM XLIV.

Honore omnes præveniendi.

TEXTUS. Hunc ergò zelum (*bonum*) ferventissimo Amore exercean Monachi: idest, ut HONORE SE INVICEM PRÆVENIANT. *Cap. LXXII. de Zelo Bono &c.*

44.



EXEGESES.

STella nitet quævis: minor attamen esse videtur,
 Quæ verè major, lucidiórque micat.
 Nemo hominum virtute omni caret undique vilis:
 Nulla est, quæ nullo præstet, Imago DEI.
 Hinc nullus Fratrum merito fraudetur honore,
 Ne spernas, præ te qui nitet ante DEUM.

Rutila Siderum pompa, arbitro ignorantium hominum
 oculo, planè perperam æstimatur. Minora censetur
 illa, cùm revera maxima sint, ad quorum celsitudinem
 oculorum nostrorum hebetudo penetrare vix demum,
 & ne vix quidem valet. Majora creduntur, quæ propiùs vi-
 den-

dentur. Ità fallitur sensus noster in Stellis : utinam verò non æquè, immò fœdiùs multò hallucinaretur animus noster æstimatione Confratrum. Caput omnis honoris in homine, quoddam sit Imago, & Servus DEI. Inde Corpus ejus est Templum DEI, & Anima ejus sedes atque thronus est Gratiæ. Inde Christus acquisivit eum Sanguine suo, pascit eum Corpore suo, vocat eum, & exspectat ad Gloriam suam. Inde, quisquis est Religiosus, attinet ad peculiare Domesticos DEI: quisquis est Sacerdos Altissimi, dignior Angelis, dispensat Myſteria tremenda DEI. Hæc in homine non intueri, animalium hominum est, qui non percipiunt ea, quæ DEI sunt. Quisquis verò agitur spiritu DEI, hæc apud se jugiter pensat, ac proinde honore quemlibet finè dubio promptè & ex animo prævenit. Differunt equidem, uti Stella à Stella in claritate, ità Frater à Fratre merito Virtutis. Quemadmodum tamen Stella quælibet idèd nitet, quia Stella est, non quia magna est: ita & Fratrem honorare oportet, non suæ merito Virtutis, sed quia Servus, & Imago est DEI. Uti Dominum laudare oportet in Sanctis suis, ita & honorare necesse est in Servis suis. Majestatem lædit, quotusquisque in ejus imaginem offendit. Meritorum Gradus sicut in beatis cæli Civibus, ita pariter in Viatoribus solus discernit, appendit, novitque DEUS: qui & solus præmia habet. Temeritas ingens, occupare tribunal DEI. Judicium mendax, arbitrari de meritis. Tantus quilibet, quanti à DEO habetur, cujus consilium nemo novit. Hoc scimus, velle DEUM, uti à nobis diligere omnem hominem, ita & honorari: quia homo est, quia servus suus, quia imago sua. Sed hæc dilectio, honor iste minimè excludunt correctionem fraternam hominis peccantis: modò cum honore fiat, dumque peccato moderatè irascitur, peccantem non contemnat.



SYMBOLUM XLV.

Infirmitatum alienarum tolerantia.

TEXTUS. INFIRMITATES siue Corporum, siue morum, patientissimè TOLERENT. Eod. Cap. LXXII.

45.



EXEGESES.

*Alter in alterius tergo sua cornua fulcit,
Dum Cervina cohors flumen inire parat.
Si tanti patiens oneris sit bestia bruta,
Infirmos homines non ferat alter homo?
Quod tibi vis fieri, fac Fratri: Corpore nāmque
Mente parique sumus. Quemlibet error habet.*

Qui infirmum hominem fecit Sapientissimus DEUS, æterno vinculo hominem homini, sibi verò homines omnes ipsa infirmitate alligavit. Sic etenim locum fecit miserationi nostræ, & misericordiæ suæ, quæ est super omnia opera ejus. Beati ex nunc misericordes, quoniam & ipsi misericordiam consequentur. Vitæ nostræ

meritum sola propè Dilectio : Dilectionis objectum mutua infirmitas, si secundùm DEUM sentiamus. Veritatem ipsam Incarnatam audire libeat, ità ratiocinantem Math. V. v. 43. *Audistis, quia dictum est: diliges proximum tuum, & odio habebis inimicum tuum. Ego autem dico vobis: Diligite inimicos vestros: benefacite his, qui oderunt vos. - - - Si enim diligitis eos, qui vos diligunt, quam mercedem habebitis? nōne & publicani hoc faciunt? & si salutaveritis fratres vestros tantum, quid ampliùs facitis? nōne & Ethnici hoc faciunt? Estote ergo perfecti, sicut & Pater vester cælestis perfectus est, ut sitis filij Patris vestri, qui in cælis est: qui Solem suum oriri facit super bonos & malos, & pluit super justos & injustos. Vides, objectum dilectionis in homine, tam apud DEUM, quàm apud homines, non tam esse amabilitatem Corporis ejus, morumque suorum, quàm utrorumque infirmitatem? Non, quia infirmitas est, sed quia miserabilis est, DEIque ordinatione locum facit miserationi. Hoc officium proximo suo quisque fideliter præstiterit in via præsentis, ubi onera sunt & infirmitates: in Patria Requiem consequetur perennem, quæ omnes omnibus oneribus eximit. Ne itaque patiamur bestias homine humaniores. Nōne, inquit beatus Augustinus, *quosdam Cervos alloquitur Apostolus, dicens: Alter alterius onera portate, & sic adimplebitis legem Christi?* Quisque suos patitur manes, quod facile largimur Poëtæ: largiamur ergò & Christo, quod aded sollicitè suasit: *Quæ vultis, ut faciant vobis homines, & vos facite illis.* Ecce! sic decet nos omnem implere justitiam.*



SYMBOLUM XLVI.

Obedientia mutua.

TEXTUS. Obedientiam sibi certatim impendant.
Eod. Cap. LXXII.

46.



EXEGESES.

DUm volucrum dat turba fugam, secat aera pennis,
Quælibet est princeps: quò præit una, volant.
Mutua sic Fratres Fratrum quoque iussa capeffant,
Præfulis imperio non reprobata fui.
Quisquis in hoc lapsus, veniam prece supplice poscat,
Gaudeat ut stabili sacra quiete Domus.

Præfuli ante omnes, post Præsulem omnibus obediri,
DEUS, & Natura, Lex, & Humanitas, Pax insuper,
& Charitas uno cumulo postulant. Natura duce,
quam rectissimè condidit DEUS, juniorum est omnium, Seni-
bus deferre, uti Senum, juniores diligere. Interroga jumenta
singula, & legem hanc mutua à DEO vel brutis cordibus su-
is inscriptam, oculis tuis undique pendent. Legis & Huma-
nitatis æterno canone sancitum, ut una in Republica, commu-
nibus

nibus in Rebus, communi consilio & consuetudine vivatur. Pax tandem & Charitas, quia unionis tranquillæ sunt vincula, scindi animos proprio sensu non ferunt. Rectum itaque ordinem, quisquis propositi sui nimium tenax est, multa difformitate pervertit. Ergò cedere facile, si modò Veritas, & præceptum DEI, Lex deinde Regulæ, vel Jussa Superiorum id finant, cedere, inquam, facile, aut statim in concordiam redire, sicque mutuo sibi obedire, pacifici Fratris est, propriique sensus elationem studio humilitatis reprimere. Vincit in ejusmodi lucta, qui primum se vinci libero magnoque animo permittit. Ità victo per hominem Charitas tribuit palmam, Pax coronam imponit, triumphum DEUS ipse adornat. Audeamus aliquid adversum nos ipsos, ut nihil in nos audeat hostis antiquus, versipellis ille litium feminator. Quæcunque in eum Arma cujuslibet Virtutis expedias, nullis tamen eundem, & superbiam ejus, quàm sancta humilitate illustrius certiùsque debellabis. Spiritus est, & idèd sapientior te, castior te, abstinentior te: sed humilis esse non potest. Hoc telum quia non habet, præ omnibus illi lethale. Per hoc devictus à Filio DEI, illud in omnibus servis DEI ante omnia tela perhorrescit, & fugit. Quantum porrò illud ipse tibi eripere nititur, inflammans te ad sensum tuum contra fratrem pertinaciùs tuendum: tantum tu pro hoc telo servando, in quo uno ferè stat omnis Victoria tua, totis viribus connitere, & omni tempore decerta.




SYMBOLUM XLVII.

Communis Utilitatis studium.

TEXTUS. Nullus. quod SIBI UTILE judicat, sequatur, sed quod magis ALIJ. *Eod. Cap. LXXII.*

47.



EXEGESES.

Tunc Cytharæ ludus mulcebit dulciter Aures,
Chordula si quævis consona ritè canat.

*Tunc Domus omnigenæ Virtutis flore nitebit,
Si commune juvent singula membra bonum.
Non tibi sed Domui studio quocunque labora:
Flore Domus nitido, tu quoque flore nites.*

Nulla felix & diuturna stabit Respublica, cujus cives commune bonum privato non anteponunt. Non DEI gratiam illa merebitur: non servabit pacem internam: non eludet vim hostium: non promovebit commercia: non opibus proficiet: quin potius, animis propria utilitate divisus, se ipsa desolabitur. Uti Cytharæ suavitatem harmonicam vel unica, quæ dissonè strepuerit, chordula totam in aure dissolvit, & vitiat: ità proprii commodi impertinens studium

um fortunam omnem Civitatis & Claustri pessumdat. Juvenes & Virgines, senes cum junioribus laudare nomen Domini concordibus vocibus hortatus est Propheta Regius. Niniven Urbem servabat jejunium Regis, & populi, infantium atque lactentium, immò & pecorum ac jumentorum. Stetisset Jerusalem, quantumvis à Romanis vallata, nisi animos Urbanorum occupassent studia privata, scidissent Religionis dissidia, invidia & ambitio in mutuas cædes armassent. Quid imperia florentia quarumlibet Monarchiarum, nisi commoda privata dissolverunt? Væ Domui sacræ, ubi singuli, vel plurimi quarunt, quæ sua sunt, non quæ communia! vicino jam pede fores ejusdem desolatio premit. Amate, Fratres, Gremium vestrum, illúmque in sinum fovendum omne studium conferte, quo omnes fovemini. Hoc dissipato ubi recubabitis? Anne commodior vobis noverca, quàm Mater? Horreat quilibet nostrum esse filius Benjamin, filius doloris, vitiô suô. Lachrymæ Matris, extortæ impietate, crudeles poenæ filiorum, illo ultore, qui præcepit: *Honora Patrem tuum, & Matrem tuam.* Nonne filii seculi parentibus suis egentibus ad alimoniam tenentur? quidni filij Religionis gremio suo ad communem utilitatem? Noverit ergò, se in DEUM, & Naturam peccare, in Legem, & Humanitatem delinquere, qui insuper habet, quod adedè justè ac sapienter instituit sanctus suus Legislator: *Ut nullus, quod sibi utile judicat, sequatur, sed quod magis alij.* Quis non patrem derideret, cujus filij sicut novellæ olivarum in circuitu mensæ suæ, dum reficit: at verò dum laborandum est, deliciantibus vel otiantibus pro libitu filiis, domus tota mercenariis plena est? Hos amores tu Matri, ut eam omnium risibus & fannis prostituas? Et filium te reputas? Et panem illius exigis? Quinon laborat, non manducet. Et si porrò manducet, nulla DEI benedictione manducabit.



SYMBOLUM XLVIII.

Charitas Fraterna.

TEXTUS. Charitatem Fraternitatis casto impendant amore. *Eod. Cap. LXXII.*

48.



EXEGESES.

*Quam quadri lapides arcta compage ligati
Componunt Turrim robore quisque suo ,
Non timet illa minas , semper fortissima perstat ,
Contemnens hostem fulmina nulla pavet.
Sic quoque , quam Fratrum Dilectio mutua firmat ,
Hostibus insultat non superanda Domus.*

SI Frater , qui adjuvatur à fratre , quasi Civitas firma ,
teste Sapiente : quàm bonum , quàmque jucundum ,
immò quàm tutum erit , tot Fratres habitare in unum ?
Cohors fraterna sub labaro sancti Amoris ad bella procedens
verè terribilis hostibus , ut Castrorum Acies ordinata. Quid
ampliùs Dominus Exercituum ordinat in Sponsa sua Ecclesia
præter Charitatem ? quid , obsecro , præ Dilectione mutua de-
siderabiliùs cupit ? Ipso certè perhibente id discimus , dum aje-
bat:

bat: *In hoc cognoscent omnes, quia mei estis discipuli, si dilectionem habueritis ad invicem.* Sola tessera Militum Christi Amor est Fratrum. Ergò è converso diabolus Charitate fraterna nihil terribilius odit, nihilque potentius fugit. Hanc nè laceret, agite Lapidés vivi, Lapidés electi! Vestram in tutelam Turrim vestram amore mutuo communitè. Hic si è cordibus vestris excefferit, ecce! hostis antiquus muros habebit. Quo prætereà animo sine amore Jugum Domini portabitis, ipso, qui tantopere jubet dilectionem, non confortante, humeris multorum se subtrahentibus, bona Matre Charitate sudores vestros non abstergente? Suave illud vultis? Diligite: & plusquam melle condietis. Solius Amoris est: è spinis Uvas, è tribulis ficus colligere. Amore fratrum ad Amorem DEI pervenitur: si tamen propter DEUM, inque DEO amentur fratres, & ità amentur, ut se amari intelligant. Amor neque profanus, neque otiosus, sine sancto, & efficacia operis destitutus, illam Regulam possidet, per quam Lapidés Sanctuarij in quadram aptentur, mutuo sibi, & arctè, ac firmiter coherentem. His Architectis turris Babel ædificabitur, quam DEUS confusione labiorum & cordium vindicabit. Omnes ergo in amando DEO conspiremus, & in hoc amore juvemus nos mutuo: sic demum ædificabuntur muri & turres Jerusalem.



SYMBOLUM XLIX.

Abbatis Dilectio.

TEXTUS. ABBATEM suum sincera & humili
Charitate DILIGANT. Eod. Cap. LXXII.

49.



EXEGESES.

Semper Apes Regem tenero venerantur amore,
Inque oculis unum hunc, hunc animisque ferunt.
Sic decet & Fratres communi assurgere Patri,
Hunc manibus, pedibus, corde, animoque sequi.
Infelix Domus hæc, ubi languida corpora Præsul
Cogit in obsequium, sed sine corde, suum.



More obsequi tantò dulcius, quàm adigi timore, quan-
tum à se distant, meridiano sub Sole, atque noctur-
nam & fuliginosam ad lampadem, vel planè ad Lu-
nam pallentem operari. Vis & vigor omnis disciplinæ Regula-
ris in Claustro sincerus ac humilis amor Prælati. Corda qui
possidet, corpora spontè obsequentia habet. Nobilis equus
umbrâ virgæ regitur: amor sincerus eadem planè est voluntate

cum dilecto. Quàm suave Fratribus omnibus foret, ad nutum esse sub Abbate, si ante scholam Obedientiæ in schola amoris sancti egregiam operam posuissent. Quotquot interim Patrem non amant, sanè videant, quomodo filiorum dulce nomen mereantur. Sapiens omni Mundo in exemplum proposuit quatuor Minima terræ, sapientiora sapientibus, *Proverb. XXX.* Formicas videlicet, Lepusculum, Locustam, & Stellionem. Magister prætereà Divinus fortunæ suæ nimium sollicitos considerare iussit Lilia agri, immò & scænum, quod hodie est, & cras in clibanum mittitur. Nos porrò non dedignemur, ut perutili nobis disciplinæ sit apud Respublica, summis ingeniis ferè ad prodigium obstupescenda. Quantus in ea Reguli sui amor? Hoc Uno deliciantur omnes: hoc valente omnes valent: hoc superstitite nulla cedit. Migrantem comitantur, circumstant fremitu, agmine juncto contra hostem tuentur. Pereunte illo tantum non omnes emoriuntur tristitia, dispersæ diffugiunt, paulò pòst etiam pereunt. Putamus, hæc animalcula minima, natura duce tam rectè sapientia, nobis, qui juravimus, Abbatem Christi locò habere, quem & ejus prænomine honoramus, exemplo egregio, si verò Patrem spernamus, rubori non esse? Dulciùs præ apibus in corde discipuli mellificat Amor Magistri.



SYMBOLUM L.

CHRISTO nihil præponendum.

TEXTUS. CHRISTO omninò nihil præpo-
nant: qui nos pariter ad vitam perducatur æter-
nam, Amen. Eod. Capit. LXXII.

50.



EXEGESES.

Ignem quis vidit flammæ convertere subtus,
Pérque suos apices lambere utrúmque latus?
Dum superest, fursum est, obstantia singula transit,
Effugit, erumpit, séque per Astra levat.
Sic pete tu CHRISTUM, mortalia singula sperne:
Hic tibi sit Centrum, Dux, Via, Meta, Scopus.

CHRIſTUS, DEUS de DEO, Lumen de Lumine,
DEUS verus de DEO vero, de ſeipſo teſtatus eſt:
*Ignem veni mittere in terram. & quid volo, niſi ut
accendatur?* Unde & Apoſtolus Chriſti tam liberè ad omnes:
*Si conſurrexiſtis cum Chriſto, quæ ſurſum ſunt, quærite, ubi
Chriſtus eſt in dextera DEI ſedens: quæ ſurſum ſunt, ſapite,*

non quæ super terram. Sursum igitur corda, quotquot ignem à Christo missum concepistis: quotquot à morte Seculi nequam cum eo consurrexistis in claustro. Una sit omnium tefera: *Tamdiu sursum, quamdiu supersum.* Omnino nihil ille Christo præponat, qui ab eo vocatus est de tenebris in admirabile lumen. Per quæ res primò fit, per eadem & conservatur. Igne vocantis vos DEI accensi, semper Ignis existite. Propter Christum cæpistis: in illo spirare, in illo exspirare. Hunc time, hunc amare: sub illo humiliamini: huic obedite. Propter hunc pauperes, in eo solo divitias quærite. Propter illum abstinete ab omni specie mala: ex illo luceat lux vestra coram hominibus. In hoc omnes diligite: hunc in pauperibus suscipite: hunc in infirmis curate. Huic vivite: huic psallite. Nemo vestrûm, quæ sua sunt, uspiam quærat, sed tantum, quæ JESU Christi. Deligite vobis hunc Librum Vitæ: hunc quærite in Libris omnibus: huic omnia studia vestra in omni loco, & omni tempore consecrate. Nunquam eum ex corde, ex animo, ex oculis vestris dimittite super terram: quem comprehendere æternum in cælis concupiscitis. *Siquis*
verò inter vos non amat Dominum JESUM CHRI-
STUM, anathema sit,

A M E N.



Lilienfeld

coll. alt.

12 Bl., 28 L., 4 Bl., 100 Bl. : 1 Tag gest. von ..

2 fein gest. Kopfstücke u. 2 ebensolche Initialen

50 reizvolle Embleme/Köpfe.

vgl. Prag 363.

2 St. I.

"H. K. 41/162

1 St. u. 3. Bl.

Landw. u. G. u. u.

Embleme B. u. u. u.

334

1. leere Titelseite, unten schon ergänzt,

Bei der Kopfstück links unten Ecke braun u. in festgelegt

Hölzner Brokatpapieranschlag, nachgebunden

